

Sikûn Korît

Pawre wam Korît kãm Jejus kôt hkwỳjê hwỳr kagà nẽ mẽn̄h kôt kagà hõ mẽn̄h

Pawre na pre kagàja nhĩpêx. Kêp mry hkà ho ixkre nhĩpêx nẽ ho wẽnê ho pa xwỳnh na pre. Tã hpãnhã kêp Jejus nhỹ hã hkrajê jahkre ho pa xwỳnh. Jakamã na pre kagàja nhĩpêx nẽ Korît kãm mẽ kot Jejus kôt amnhĩ xunhwỳr xwỳnhjê hwỳr kumẽ. Na pre ra mẽ hwỳr wamta nhĩpêx nẽ kumẽ. Wam kagà nhĩxi pê Wam Korît. Tã axte hkôt ja nhĩpêx nẽ mẽ hwỳr mẽn̄h jakamã kagà nhĩxi pê Sikûn Korît.

Na pre Korît kãm Jejus kôt mẽ htõjê hõ axtem nẽ nã puro kamã hpijaàm kêt o pa nhũm Pawre tee ri harẽn̄h ma nẽ mẽ hwỳr wam kagàta mẽ nẽ kamã tanhmã mẽ kot hipêx to hã mẽ kãm karõ. Tã kagà ja kamã axte tanhmã hã mẽ kãm karõ hto.

Na pre ra Korît wỳr mẽ kêp Kris nhỹ hã mẽ ahkre hã amnhĩ to hêx xwỳnhjaja mẽ hwỳr pøj nẽ tanhmã mẽ kãm kapêr jarẽn̄h to ho mẽ hkôt pa. Nẽ tanhmã mẽ kãm Pawre ho hêx to. Jakamã nhũm kagàja kamã tanhmã mẽ kãm amnhĩ tã àprâr to nẽ kãm mẽ hkĩnh tỳx ã amnhĩ jarẽ. ã na pre Pawre mẽ kãm mêm̄oj jarẽn̄h nẽ hã kagà anẽ. Nẽ mẽ kãm hã kagà ho:

¹ Pa Korît kãm Tĩrtũm krajaja. Xà mẽ apiitã mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Mẽ amã nẽ mẽ anhõ pika pê Gres kamã

Tîrtûm krajê mê mê ato ixpimrààtã mê awÿr hipêx nê kumê. Ixpê Pawre na pa hte Tîrtûm jamaxpêr xà hkôt ma Jejus Kris nhÿ hã krî piitã hkôt hkrajê jahkre ho ri ixpa. Tã Kris kôt mê pahtô Ximotre mê wa mê awÿr hipêx nê kumê.

² E kê Mëpahpãm Tîrtûm mê Pahihti Jejus Kris wa mê ato mex rãhã ho pa. Nê mëmoj to mê akutã nojarêt rãhã ho pa. Ka mê wa kukwak ri ajamakêtkati nê amex nê ri akînh nê apa ho apa.

Pawre kãm amnhî xà htÿx kamã hamak pyma hkê ã harênh

Rômãn 1.11-12; Korosê 1.11; Sikûn Tesarôn 2.16

³⁻⁴ Nà Tîrtûm kêp mê panhõ Pahihti Jejus Kris nhîpêxà na. Nê kêp Mëpahpãm maati jakamã na hte mê pakamã ukaprî nê tanhmã mê pahto mex to ho pa. Kot puj mê mëmoj tã tanhmã amnhî to nê pahkaprî nê ri papa nhûm ja hã mê pahpumu hãmri nê hamaxpêr pix o akupÿm mê pahto mê paxihtÿx. Mëmo kaxyw na hte ã mê pahto mex anê? Nà mê pahte amnhî tã omunh nê amnhî pyrãk mê hkaprî nê ri mê pa xwÿnhjê jamaxpêr o hihtÿx o mê hkôt papa kaxyw. Ja kaxyw na hte mê pajamaxpêr o hihtÿx. Jakamã kwa pu mê kãm mex o mex ã mãn harênh rãhã ho papa.

⁵ Na htem tõiã ixto Kris nhîpêx pyrã nê tanhmã ixto pa amnhî xà htÿx kamã ijamak o ri ixpa. Tã nhûm Tîrtûm inhîpêx o te Kris nhîpêx pyrã nê hamaxpêr pix o tanhmã ixkrã hto pa mê kutã amnhî to htÿx nê arî mê hkôt ixpa. ⁶⁻⁷ Na pa hte mê amã Kris kapêr jarênh o ixpa. Mê ate inhmar nê hkôt amnhî nhîpêx kaxyw. Jakamã na hte mê kãm Tîrtûm kapêr mar prãm kêt xwÿnhjaja tõiã mê

atã ixtomnuj nẽ pa amnhĩ xà htỳx kamã ijamak o ri ixa. Tã kwãr mẽ mãmri ã inhĩpêx anẽ. Mẽ ate Jejus kôt amnhĩ xunhwỳr tỳxja na inhmã hprãm. Na htem tanhmã Kris ã inhĩpêx to nhũm Tĩrtũm mẽ hã ixpumu nẽ tanhmã ixkrã hto pa inhmã amnhĩ xà htỳx kamã ijamak pyma hkêt nẽ ixa. Nẽ arĩ mẽ hkôt mẽ kãm kapêr jarẽnh rãhã ho ri ixa. Na hte Tĩrtũm amarĩ ã inhĩpêx anhỹr kêt nẽ. Mẽ ate ã kot inhĩpêx anhỹr ã ixpumunh nẽ ixyrà nẽ amnhĩ kaxyw kãm ajamxpêr tỳx kaxyw na hte ã inhĩpêx anẽ. Mẽ ate ja hã ixpumunh nẽ ã ajamxpêr anhỹr kaxyw nẽ mẽ ajamxpêr o:

—Nà kot pa nhỹrmã Pawre pyrà nẽ tõhã mẽ mỳrapê amnhĩ xà htỳx kamã ijamak o ixa. Hãmri nhũm Tĩrtũm ja hã ixpumu nẽ te ho Pawre nhĩpêx pyrà nẽ tanhmã ixto pa inhmã amnhĩ xà htỳx kamã ijamak pyma hkêt nẽ ixa. Nà koja ã inhĩpêx anẽ.

Anhỹr o mẽ ajamxpêr kaxyw na hte Tĩrtũm mẽ kutã ixto ixihtỳx. Mẽ ate ja hã ixpumunh nẽ akupỹm tãm ajamxpêr pê Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamxpêr kêt nẽ.

Tĩrtũm kêp mẽ papytâr xwỳnh ã harẽnh

⁸ E Kris kôt ixkwỳjaja. Kot paj ixprĩ hã mẽ amã tanhmã amnhĩ jarẽnh to ka mẽ inhma. Na pa pre ma pika pê As wỳr mỗ nẽ mẽ kãm Jejus kapêr jarẽnh o ri mẽ hkôt ixa. Hãmri nhũm mẽ hkwỳjaja ja hã ixtomnuj tỳx nẽ pa amnhĩ xà htỳx kamã ijamak pê mẽ hkôt ixa. Kironhỹx pa pre mẽ kamã ty. ⁹ Na pa pre tee ri amnhĩ kukamã ijamxpêr o:

—Koja pěr mẽ ixpĩ. Tanhmã kot pa we amnhĩ to nẽ tokyx mẽ kêp amnhĩ pytã? Kot paj tee ri inhmã mẽ kêp amnhĩptår prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot ixpĩr tã nhũm kot akupỹm ixto ixtĩr kaxyw tapxipix na àhpumunh tỳx. Nà kot paj amnhĩ kaxyw tapxipix mã mãn ijamaxpěr o ri ixpa nhũm amnhĩ tã ixpumu nẽ hkĩnh nẽ. ã ixte amnhĩ nhĩpêx anhỹr o ixpaja na kãm hprãm. Anẽ.

¹⁰ Tã nhũm pre ã inhĩpêx anẽ nẽ xatã mẽ kêp ixpytår o ixkõt pa. Koja ã mẽ kêp inhĩpêx anhỹr rãhã ho pa. Nà ã kot inhĩpêx anhỹr mã kênã.

¹¹ Nom kwa kêr ka mẽ apiitã arĩ ixto Tĩrtũm wỳr rãhã ho ri apa kê mẽ ama nẽ mẽ kãm ixkurê xwỳnhjê kutã ixto ixihtỳx rãhã ho pa. Nẽ ixto mex rãhã nẽ. Hãmri nhũm mẽ ohtõ nẽ kot mẽ kêp tanhmã ixpytår to hã ixtã omu nẽ ixtã kãm mex o mex ã harẽ.

Pawre kot mẽ kãm amnhĩ tã aprãr ã harẽnh

Wam Korîť 2.1-5

¹² Nẽ na xep pre atar Kris kõt mẽ pahkwỳjaja tanhmã ixto kapěr punuj to nẽ Jesus kot mẽ awỳr inhmẽn hêt ã mẽ amã ixto hêx. Nẽ ijakwa nhĩkjê ho inhmã mẽ akĩnh nẽ ijakwa nhĩkjê ho mẽ ato ixkapěr punuj ã ijarẽn h o ri pa. Nom ixte ã amnhĩ nhĩpêx anhỹr kêt. Aa ixte tanhmã mẽ ano kupyrr to hkêt. ãm hãmri na pa mẽ amã amnhĩ jarẽ nẽ tãm mẽ amã ixkapěr o ri ixpa nẽ tãm ri mẽ anhĩpêx o ri ixpa. No ijamaxpěr tũm kõt tanhmã mẽ anhĩpêx to hkêt nẽ. ãm Tĩrtũm kot mẽmoj to mẽ pakutã nojarêt ã omunh xà hkõt pix mã na pa hte ỹ hã mẽ ato mex o ri ixpa. Ijamaxpěr nyw o. Na pa

hte Tîrtûm pyrâ nê mê piitâ mê ho mex nê. No mê kajaja ixpyrân mê apê hkra jakamã na pa hte mê ato mex kumrêx o ri ixpa. ¹³ Na pa hte mê amã kagâ hkwý nhîpêx nê ixprî hã mê amã tanhmã mêmoj jarênh to. Mê ate kamã harênh nê mar mex kurê kumrêx kaxyw. No na pa hte mê amã tanhmã ixêx to rý tanhmã mê ano kupyr to hkêt nê. ¹⁴ ã ixte amnhî nhîpêx anhÿr o ri ixpa htã kormã mê apiitã ja hã ixpumunh mex kêt nê. Nê Jejus kot mê awÿr inhmênh ã ixpumunh mex kêt nê. Jakamã na hte mê akwýjaja ixto akapêr punuj o pa. Tã kot kaj mê nhÿrmã ãm hãmri Jejus kot mê awÿr inhmênh ã axpên mã ijarê pa mê ama nê ixkînh nê. Hãmri nhûm nhÿrmã mê panhõ Pahihti Jejus mê pahwÿr akupÿn wrý pa kãm mê ajarê nê kãm:

—E Pahihti. Jajê mã na pa pre akapêr jarênh o ixpa nhûm mê inhma nê akôt amnhî xunhwÿr kurê kumrêx nê tãm amnhî nhîpêx mex o pa.

Anhÿr o kãm mê ajarê. Hãmri nê ã mê ate amnhî nhîpêx anhÿr ã mê apumunh kôt ixkînh nê. Ka mê ajaxwÿja akînh pê tanhmã kãm ijarênh to ho akuhê.

Pawre hêx kêt ã kot amnhî jarênh

Wam Korîit 16.5-6

¹⁵⁻¹⁶ Nê na pa pre ra mê awÿr ixkrâ. Ixte ma mê awÿr inhmôr nhûm mê ate ixpumunh nê akînh ã mê akamnhîx nê mê awÿr ixkrâ nê ijamaxpêr o:

—Nã ma Masetôn wÿr inhmôr xwÿj ri kot paj ma Korîit kumrêx wÿr mō. Hãmri nê Kris kôt ixkwÿjê pumu nê rî kormã hamũ Masetôn wÿr mō. Nê mê kamã ri ixpa tãmtã awjanã nê akupÿn Korîit wÿr mō nê axte mê omu. Jao Tîrtûm kapêr o mê ahkre

ho axkrut nhũm mẽ amnhĩ tã ixpumu nẽ hkĩnh nẽ. Hãmri pa akupỹm Jutej wỳr inhnojarêť nhũm mẽ pry hã ixàpkur xà hã inhmã mẽmoj kwỳ nhõr japêr.

Anhỹr o ijamaxpêr. ¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nẽ axpên mã ijarênh o:

—Kwa Pawre kot ra mẽ pahwỳr nojarêť ã amnhĩ jarênh tã amnhĩm nojarêť kêt kumrêx. Mãn pre ãm mẽ pamã amnhĩ to hêx nà? Ra kot mẽ pamã amnhĩ jarênh tã tokyx hpôx kêtêr hã. Anẽ.

¹⁸ Kwa mẽ ri ã inhmã ajamaxpêr anhỹr kêt nẽ. Na pa pre mẽ amã ixêx kêt nẽ. Na pa hte Tĩrtũm noo mã ãm hãmri mẽmoj jarênh o ri ixpa nẽ mẽ amã mẽmoj jarênh o ixêx kêt nẽ. Nà ãm hãmri na pa pre ma mẽ awỳr inhmõr ã amnhĩ jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tĩrtũm Kra hã harê nẽ kot amnhĩ nhĩpêx te kot Tĩrtũm kot amnhĩ nhĩpêx pyræk ã harênh o ri ixpa. Jejus haxwỳja amnhĩ to hêx kêt. Kot mẽmoj tã amnhĩ jarênh xà hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhỹrja kôt na pa inhmã ixte amnhĩ nhĩpêx o ixpa hprãm nẽ. ²⁰ Ra Tĩrtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

—Koja Tĩrtũm Jejus kukwak ri mẽ pahto mex rax nẽ. Ra kot mẽ pahtã amnhĩ jarênh xà hkôt. Nà Tĩrtũm mex o mex. Anẽ.

*Tĩrtũm kot mẽ pa hwỳr Karõ rênh ã harênh
Rõmãn 8.14; Epes 1.13*

21 Nà Tîrtûmja mex o mex. Kot mẽ pahpê hkra kaxyw amnhĩm mẽ paxunhwýr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwý nhũm Tîrtûm ja hã mẽ pahpumu nẽ mẽ pahwýr Karõ rê nhũm mẽ pahwýr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagà hto nhũm mẽ kot kêp ô dôn ã omunhta pyræk. Tã koja Tîrtûm Karõ mẽ pakamã hkrĩ pu mẽ ja hã amnhĩ pumunh kôt Tîrtûm kot nhỹrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korîit 4.21; Sikûn Korîit 10.1-2

23 E Kris kôt ixtõ nẽ ixtõxjaja. Kot paj kormã ma mẽ awýr inhmõr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tîrtûm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awýr inhnojarêt tã no ãm tee ri amnhĩ kukamã ijamaxpêr nẽ ijamaxpêr o:

—Nà kot paj taxy kormã ma mẽ hwýr inhmõr kêt nẽ. Kot paj tokyx mẽ hwýr mõi pôi nẽ kot amnhĩ tomnuj xwýnhta ã mẽ kãm akir nẽ nẽ tanhmã mẽ kãm ixkapêr to. Hãmri nhũm mẽ amnhĩ tã inhma nẽ hkaprĩ nẽ tee ri amnhĩ kukamã hamaxpêr. ã

mê kot amnhî nhîpêx anhÿr pymaj kot paj kormã
mê hwÿr inhmôr kêt nê.

Anhÿr o ijamaxpêr. ²⁴ Inhmã ma mê awÿr
inhmôr nê tanhmã mê ate amnhî nhîpêx to hã axte
mê amã karô kamã ixihÿx prãm kêt. Mê akwÿjê
rom ra mê ate Kris hkôt amnhî xunhwÿr tÿx kênã.
Tã mê ate hkôt amnhî nhîpêx mex o akînh nê apaja
na inhmã hprãm.

2

¹ Na pa pre ma mê awÿr mô nê mêmoy tã mê amã
akir nê nê tanhmã mê amã ixkapêr to ka prem
inhma nê akaprî nê ri apa. Tã inhmã akupÿm
mê awÿr inhmôr nê axte mê amã ixàkjêr prãm kêt
jakamã na pa kormã mê awÿr inhmôr kêt nê. ² Kot
kaj mê akînh nê apa pa ijaxwÿja ixkînh nê ixpa. No
kot paj ma mê awÿr mô nê mêmoy tã mê amã akir
ka mê tee ri inhma nê akaprî nê. Pa mê apumu nê
ijaxwÿja ixkaprî nê.

³ Ja pymaj na pa pre wam ixte mê awÿr kagà
mênhta kamã mêmoy nê tanhmã mê amã ixàkjêr
to. Mê ate kamã harênh nê mar nê tokyx kormã
mê awÿr inhmôr xwÿj ri tanhmã mê ate amnhî
tomnuj tota kaga nê tãm amnhî nhîpêx kaxyw. Kêr
pa mêmoy arîgro hã ma mê awÿr môn pøj nê mê ate
tãm amnhî nhîpêx o apa hã mê apumu nê ixkaprî
hkêt nê ixkînh nê. Ka mê ajaxwÿja ixpumu nê
akînh nê. ⁴ Jakamã na pa pre ã mê amã kagàta
nhîpêx nê mê awÿr mênh anê. Nê kamã mêmoyta nê
tanhmã mê amã ixàkjêr to. Na pa pre ixkaprî htÿx
nê tee ri mê akukamã ijamaxpêr o inhmÿr rax pê
mê amã mêmoyta ã kagà. No ãm mê akaprî kaxyw

na pa pre mẽ amã hipêx kêt nê. Ām mẽ ate kamã harênh nê inhmar nê ajamxpêr o:

—Hêxta waa nê. Nà Pawre na kãm mẽ pahkînh tỳx kumrêx. Hã na pre mẽ pahte tanhmã amnhĩ tomnuj to hã mẽ pajarênh ma nê tee ri mẽ pakukamã hamaxpêr pê kagàja kamã hã mẽ pamã akir nê mẽ pahwỳr kumê. Nà kãm mẽ pahkînh tỳx kãm na ã mẽ pamã kapêr kãm hihtỳx anê.

Anhỳr o ajamaxpêr kaxyw na pa pre hipêx nê mẽ awỳr kumê.

Mẽ kot axte amnhĩ tomnuj mã hamaxpêr kêt ã mẽ kãm karô

Rukre 17.3-4; Wam Korîť 5.1-13; Karatas 6.1-2

⁵⁻⁹ Nê wam kagàta kamã na pa pre mẽ amã mẽ akwỳjê hō kot nã kaàkre kamã hpijaàm kêêta pa mẽ amã tanhmã hã karô hto. Ra mẽ ate harênh mar tã nê kãm akapêr kêt nê. Tã mẽ ate inhmar nê nê tanhmã kãm akapêr to nê amnhĩ nê hanor kaxyw na pa pre mẽ awỳr kagàja mẽ. Hãmri nê ijamaxpêr o:

—Ko. Kojã mẽ ixkapêr mar xà hkôt amnhĩ nê hanor japêr. Anê.

Tã ka xep prem kamã harê nê ama nê tee ri ja hã amnhĩ pumu nê akaprĩ nê. Nê ixpyrà nê apijaàm nê. Hãmri nê ijamaxpêr xà hkôt amnhĩ nê hanor kãm axihtỳx nê. Ām hãmri na ka prem ã hipêx anê. Nhũm xep tee ri ja hã amnhĩ pumu nê hkaprĩ nê hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nê akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mẽ tokyx akupỳm amnhĩ wỳr awỳ kê axte mẽ awỳr mra nê mẽ akôt pa. Ra kot amnhĩ tomnujta kaga jakamã kêr ka mẽ axte kãm ajamaxpêr kêt nê. Akupỳm

tâm kãm akapêr kê tokyx akupÿm tâm hamaxpêr nê hkînh nê pa. Kot kaj mê tokyx ã hipêx anhÿr kêt nê nhũm tee ri amnhĩ kukamã hamaxpêr nê hkaprĩ nê pa. Ja pymaj kwa mê amã hkînh ã kãm amnhĩ jarê nê akupÿm tâm kãm akapêr pê tâm hipêx o ri apa. Kê amnhĩ tâ mê apumu nê akupÿm hkînh nê tâm hamaxpêr. ¹⁰ E kêr ka mê axte kot tanhmã amnhĩ tomnuj tota mã ajamaxpêr kêt nê. Kwarĩ ho kwarĩ. Kot kaj mê ã hipêx anê pa ijaxwÿja ma hipêx anê. No pa na pre tanhmã ixtomnuj to hkêt nê. ãm Jejus kapêr kwÿm na pre ri ã amnhĩ nhĩpêx anê. Tã ra kot amnhĩ tomnujta kaga jakamã kot paj Jejus nhÿ hã akupÿm tâm hipêx nê kot amnhĩ tomnujta o ijamakêtkati tokyx anê nê axte kãm ijamaxpêr kêt nê. Mê apiitã mê amex nê ri mê apa kaxyw. Jakamã kêr ka mê ajaxwÿja mê amex nê apa kaxyw ã amnhĩ nhĩpêx anê nê axte kãm ajamaxpêr kêt nê. ¹¹ Kwa mê tokyx ja ho ajamakêtkati. Kê Satanasti tee ri ja hã mê apumu nê mê amã mê ate tanhmã amnhĩ tomnuj to hprãm xàj tee ri tanhmã ri mê ato ho pa kaprÿ. Kêr pu mê Satanasti kot amnhĩ nhĩpêx kôt amnhĩ nhĩpêx o ri papa hkêt nê. Ra mê pahte Tĩrtũm kapêr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harênh

¹² Nê na pa pre ja rũm ixkato nê ma Tôx wÿr mō. Ixte mê kãm Kris jarênh o mê hkôt ixpa kaxyw ma mê hwÿr mō. Nhũm Pahihti Kris ixkukamã tanhmã mê hkrã hto jakamã pa pre mê hwÿr pōj nhũm mê piitã kãm ixujarênh mar prãm nê. Pa pre mê kãm Tĩrtũm kapêr jarênh rÿy ho mê hkôt

ixpa. ¹³ Na pa pre Xitre ra mẽ hwỳr ixkukamã hpôx ã hkamnhĩx tã nhỹri omunh kêt nẽ. Hãmri nẽ ijamaxpêr o:

—Hêxta waa nẽ. Inhmã Korîit kãm Jejus kwỳjê jarênh mar prãm. Na pa tee ri mẽ hkukamã ijamaxpêr o ixpa. Nom kormã Xitre mẽ kurũm akupỹn hpôx kêt. Mãn kormã Masetôn kamã pa.

Anhỹr o ijamaxpêr hãmri nẽ mẽ kãm amnhĩ jarê nẽ ixkato nẽ ma Masetôn wỳr krĩ hkwỳ hkôt hapêr o mỗ. Tã ra hwỳr ixkato nẽ omu.

*Te mẽ pahpê mẽhkuxwa xà pyræk ã mẽ pajarênh
Epes 5.2; Pìrìpos 4.18*

¹⁴⁻¹⁶ Nà Tĩrtũmja mex o mex. Na hte mẽ pahto mex rãhã ho pa. Nẽ mẽ kot mẽ panê àmnàr xwỳnhjaja nhũm hte tanhmã mẽ ho pu mẽ ma paxàmnhĩx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk. Mẽ pahte Kris kôt amnhĩ nhĩpêx jakamã Tĩrtũm mã te mẽ pahkuxware nẽ ri mẽ papa pyræk. Nẽ te mẽ kãm Kris jarênh o ri papa pê te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwỳjaja mẽ pama nẽ kãm mar prãm nẽ. Nẽ mẽ paxujarênhja haxwỳja te kot mẽ hkuxwa xà kuxwa mex nhũm htem hpār nẽ kãm ho amnhĩ kuxwa hprãm pyræk. Jao kãm mẽ pamar prãm nẽ Kris kôt amnhĩ xunhwỳ. No nhũm mẽ hkwỳjaja axtem nẽ mẽ kêp mẽ pamar prãm nōkati. Mẽ kumã Tĩrtũm kapêrja te kêp wenên kuxỳ htỳx nhũm mẽ kot hpār nẽ htyk pymaj amỳm kuhê pyræk. Jao kapêr kaga nẽ kêp amỳm amnhĩ xunhwỳ.

Ně na pu htem amnhĩ krã hkôt mẽ kãm Kris kapěr jarěnh o ri papa hkêt ně. Ām Tĩrtũm nhỹ hã pix mã tanhmã harěnh to ho papa.

Pawre kot katàť kôt Tĩrtũm kapěr o mẽ ahkre hã harěnh

¹⁷ Na hte mẽ kot mẽ kệp Kris nhỹ hã mẽ ahkre hã amnhĩ to hêx xwỳnhjaja te Tĩrtũm kapěr o wẽnê pyrãk o mẽ hkôt pa. Jao kàxpore hprãm xàj amnhĩ krã hkôt tanhmã mẽ kãm harěnh to nhũm htem mẽ kuma nẽ hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhỹr kêt ně. Nẽ mẽ uràk nẽ amnhĩ krã hkôt Tĩrtũm kapěr jahkre ho ixpa hkêt ně. Tĩrtũm kot mẽ akaxyw ixãm jakamã na pa hte ixkatàť kôt Kris nhỹ hã amarĩ mẽ amã kapěr jarěnh o ri mẽ akôt ixpa. No mẽ uràk nẽ kàxpore prãm xàj mẽ amã harěnh kêt ně. Tĩrtũm kot ja hã ixpumunh mex.

3

¹ Mẽ kệp Kris nhỹ hã mẽ ahkre hã amnhĩ to hêx xwỳnhjaja na htem nhỹhỹm nojarêť nẽ mẽ kot mar xwỳnhjê mã:

—E kot paj ma nhãm krĩ hõ hwỳr mỗ nẽ Tĩrtũm kapěr o mẽ ahkre. Jakamã kwa mẽ kaxyw inhmã kagà nhĩpêx nẽ kamã ixte Tĩrtũm kapěr o mẽ ajahkre mex xwỳnh ã ijarẽ nẽ hã kagà. Hãmri nẽ inhmã agõ pa ma amnhĩ kôt o mỗ nẽ mẽ kot inhmar mã xwỳnhjê mã kugõ kê mẽ kamã harẽ nẽ ijarěnh ma nẽ kãm ixkapěr mar prãm nẽ.

Anhỹr o na htem amnhĩ to mẽ hwỳr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã mẽ kot ixkatàť

kôt ixte Tîrtûm kapêr jarênh mex ã ixpumunh mex jakamã mo kaxyw kot pa ri amnhî kôt kagà jamý nê ho ixpa? Nà kot pa amnhî kôt hõ ho inhmôr kaxyw hã ixàhwýr kêt nê. ²⁻³ Mẽ kajaja te mẽ apê inhõ kagà pyràk. Na ka prem ixte mẽ ajahkre ma nê Jejus kôt amnhî xunhwýr kurê kumrêx. Hãmri nhũm Tîrtûm mẽ amã amnhî Karõ rê nhũm mẽ amã agiê ka mẽ ý hã amnhî nhîpêx nyw o amnhî nhîpêx o apa. Hãmri nhũm mẽ akwýjaja amnhî jaêr pê mẽ ate amnhî nhîpêx nyw ã mẽ apumu nê mẽ atã expên mã ijarênh o:

—Hêxta waa nê. Pêr ãm hãmri na pre Kris mẽ hwýr Pawre mẽ. Na pre ma mẽ hwýr mõi nê mẽ kãm Tîrtûm kapêr o mẽ ahkre nhũm mẽ kuma nê amnhî tomnuj kaga hpa nê hpãnhã Tîrtûm kapêr kôt amnhî nhîpêx nê tãm ri amnhî nhîpêx o pa. ãm hãmri na hte Pawre mẽ ahkre mex o pa. Hêxta waa nê.

Anhýr o mẽ atã ijarênh jakamã mo kaxyw kot pa kagà hkwy jamý nê amnhî kôt ho ixpa? Nà mẽ kajaja te mẽ apê inhõ kagà pyràk.

⁴ Na pa pre Jejus kôt amnhî xãm nhũm Tîrtûm ja hã ixpumu nê tanhmã inhmã kapêr o amnhîrît to nê inhmã:

—E Pawre. Kêr ka ma mẽ kãm ixkapêr jarênh o ri mẽ hkôt apa.

Anhýr jakamã na pa hte Tîrtûm kamnàr rom ã amnhî nhîpêx anhýr o ri mẽ hkôt ixpa. ⁵ Nom amnhî krã hkôt mẽ ahkre hkêt nê. Tanhmã kot pa we amnhî to nê amnhî krã hkôt mẽ kãm kapêr o mẽ ahkre mex nê? Nà Tîrtûm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tîrtûm kapêr nyw jarênh

⁶ Nê Tîrtûm na hte tanhmã ixkrã hto pa Karõ nhỹ hã mẽ piitã mẽ kãm kapêr nyw jarênh o ri ixpa. Amnepêm Tîrtûm kot Ijaew mã mẽmoj tã karõ xwýnh̄ta. Mojes kot kapêr tûm jarênh o pa xwýnh̄ta mex tã no nhũm mẽ tee ri hkôt kãm amnhĩ nhĩpêx prãm o pa. Nê xatã kamã harê nê omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mýrapê na prem pikaprâr pan hapêx. No kêt Tîrtûm kapêr nywja. Jejus jarênhja. Na hte Tîrtûm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahťir tûm nê papa mã xwýnh̄. No na hte nhãm mẽ hkwȳjaja kãm harênhja mar prãm kêt nê amnhĩ jarênh o:

—Nà kot paj amnhĩ krã hkôt ã amnhĩ nhĩpêx anê nê ã amnhĩ nhĩpêx anê nhũm Tîrtûm ja hã ixpumu nê ixtîr tûm nê ixpa mã xwýnh̄ ã ijarê.

Anhỹr tã no ãm ã amnhĩ jarênh anhỹr kaprý. Tîrtûm Karõ nhỹ hã mẽ kot amnhĩ to mex o mẽ pa xwýnh̄ pixjaja koja mẽ htîr tûm nê pa ho pa.

⁷ Nê Tîrtûm kapêr tûmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nê haxênh nê kamã kamàt kô htyk. Hãmri nhũm Tîrtûm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karõ nhũm Mojes kumý nê mẽ hwýr o wrý nê mẽ kãm kamã harê. Tîrtûm kot hirã htýx kamã kãm kapêr nhũm kuri mar o ãm jakamã uràk nê ý hã hkuk nhĩrã htýx kumrêx nê mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk týt nê. Tã gaa nhũm hkuk kãm hirãja amnhĩm hprĩ nê hapêx o mō. Na pre ã Tîrtûm Ijaewjê mã kapêr tûm nhõr anê. Hãmri

nhûm Mojesja ô ri mẽ kãm kamã harẽ nẽ harẽnh pa hãmri nẽ mẽ kãm:

—E kêr ka mẽ Tĩrtũm kapêr mar tỳx nẽ hkôt amnhĩ nhĩpêx mex rãhã ho ri apa. Kêr ka mẽ nhỹrmã atyk tã kê akupỹm mẽ ato mẽ atĩr ka mẽ ò krĩ kamã kuri atĩr tũm nẽ amex nẽ apa ho apa. Anẽ.

Hãmri nhũm mẽ kuma nẽ kãm:

—Tôe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarẽnh tã no ãm hkôt amnhĩ nhĩpêx kêt nẽ nhũm Mojes tee ri mẽ kot amnhĩ nhĩpêx ã mẽ omu nẽ mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhỹrmã ty nẽ Tĩrtũm pẽ awry rax kumrêx nẽ ri apa. Anẽ.

⁸ Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nẽ mẽ pamã:

—Kot kaj mẽ Ixkra Jejus kôt amnhĩ xunhwỳ pa hã mẽ apumu nẽ mẽ ato ixkra. Hãmri nhũm Ixkarõ mẽ amã agjê. Anẽ.

Kapêr ja na mex kumrêx o kot kapêr tũm jakrenh. ⁹ Kapêr tũmja mex tã nhũm htem hkôt amnhĩ nhĩpêx kêt nẽ. Jakamã na htem ty nẽ Tĩrtũm pẽ awry rax ã ri pa. No kapêr nywja na tũmta rom mex o mex. Na hte Tĩrtũm mẽ pamã kapêr nywja jarẽnh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anẽ.

¹⁰ Nẽ kapêr tũmja te kot kanê hpôk kryre pyràk. No kapêr nywja mex o kot tũm jakrenh jakamã te

kot mẽmo hpôk rûnh o kanê hpôk kryre jakrenh pyrâk. Jakamã nhũm mẽ kot hirã rax kãm ri mrar gryk ã hpôk grire nhĩrã kamã mrar kêt pyrâk. ¹¹ Tĩrtũm kapêr tũm te kot Mojes kuk pyrâk. Na pre kamã hirã rax tã gaa nẽ amnhĩm hprĩ nẽ kamã hirã hapêx o mỗ. Nẽ gaa nẽ hapêx. No kêt Tĩrtũm kapêr nywja te kot Tĩrtũm nhĩrã htỳx rãhã ho rãhãta pyrâk. Koja uràk nẽ aa hapêx kêt kumrêx.

Ijaewjê jarênh

Rômãn 11.7-10

¹² Nẽ Tĩrtũm kapêr nywja mex o mex jakamã na pa hte ixàmnhĩx mẽ kãm harênh o ri ixpa. ¹³ Te ixte Mojes kot amnhĩ nhĩpêx pyrâk kêt. Na pre hte Mojes ixkĩnhã àmnhĩx Ijaewjê mã Tĩrtũm kapêr jarênh o ri pa hkêt nẽ. Mẽ kot hkuk kãm hirãta ra hapêx o mỗr ã omunh nhũm hpijaàm pymaj na pre kupêxê puroore ho amnhĩ kuk pro nẽ ri mẽ hkôt pa. ¹⁴ Jakamã nhũm prem hprĩ hã hkuk kãm hirã pumunh mex kêt nẽ. Nẽ Tĩrtũm kapêr ã kagà htũmja nhũm prem mãânên hprĩ hã mar mex kêt nẽ. Mẽ hkrã hihtỳx jakamã te mẽ kot amnhĩ jamak pro nẽ mẽmoj mar mex kêt pyrâk jakamã mẽ kot mar tã hprĩ hã mar kêt nẽ. Nẽ hkôt ri amnhĩ nhĩpêx mex kêt nẽ. No mẽ kot Kris kôt amnhĩ xunhwỳr xwỳnhjaja na hte Tĩrtũm amnhĩ tã mẽ omu nẽ te mẽ nẽ mẽ hamak hpro xàta rênh par nẽ rênh pyrâk o mẽ hipêx nhũm mẽhprĩ hã kapêr mar tỳx nẽ.

¹⁵ Tã na hte Ijaewjaja arĩ jarãhã Mojes kot Tĩrtũm kapêr ã kagà htũm kamã harênh o pa. Nom arĩ mẽ hkrã hihtỳx jakamã te mẽ kot amnhĩ jamak pro nẽ kamã harênh o pa pyrâk o amnhĩ nhĩpêx jakamã kormã hprĩ hã mar kêt nẽ. ¹⁶ Tã koja mẽ hkwyjaja

Pahihti Jejus Kris kôt amnhĩ xunhwỳ nhũm amnhĩ tã omu nê te kot mẽ hamak nê hpro xà hpyr nê mēnh pyrāk o mẽ hipêx nhũm mēhprĩ hã kapēr nyw mar tỳx nê. ¹⁷ Pahihti mẽ Karōja wa htipxi jakamã na hte mẽ pakamã agjê nê hprĩ hã mẽ pamã kapēr o amnhĩrĩt o pa. ¹⁸ Ra mẽ pahte Pahihti Kris kôt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyrāk kêt. Nhũm Pahihti Karōja tanhmã mẽ panhĩpêx to pu mẽ ra hkôt amnhĩ nhĩpêx mex o mō. Jakamã na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkôt amnhĩ nhĩpêx mex kumrêx kêt tã ra hkôt amnhĩ nhĩpêx mex o mō. Jao te tãm kot amnhĩ nhĩpêx pyrāk o amnhĩ nhĩpêx o mō.

4

Jejus kapēr te kêp kanê pyrāk ã harēnh

Wam Korîť 2.1-5; Sikûn Korîť 1.12; Wam Tesarōn

2.1

¹ Nê na pre Tĩrtũm ixto mex nê tanhmã kãm ixàpēnh to hã inhmã karō. Ixte ma mẽ kãm kapēr jarēnh o ri mẽ hkôt ixpa kaxyw. Jakamã na pa hte ixàmnhĩx mẽ hkôt mẽ kãm harēnh o ri ixpa. ² Nhũm mẽ hkwỳjaja axtem nê ixêx o ri ixpa hã ijarēnh tã ixte ã amnhĩ nhĩpêx anhỹr kêt. Na pa hte amnhĩ tomnuj o ri ixpa hkêt nê. Mẽ hkwỳjaja kot mẽ no kupyr kaxyw mẽ kãm Tĩrtũm kapēr o hêx o pa htã pa na pa hte ã amnhĩ nhĩpêx anhỹr kêt nê. Ixprĩ hã mẽ kãm harēnh o ixpaja na inhmã hprãm jakamã na pa hte ixkatàt kôt harēnh o ri mẽ hkôt ixpa. Mẽ piitã mẽ kot ixêx kêt kôt ixpumunh mex

kaxyw. Tîrtûm kot ixêx kêt kôt ixpumunh mex.
³ No nhÿrmã mẽ htyk nê ma kuwy hwÿr mẽ pa
mã xwÿnh pixjaja na htem hprî̄ hã ixkapêr mar
mex kêt nê. ⁴⁻⁶ Satanasti tãm kêp mẽ hpãm. Kêp
mẽ kãm Tîrtûm kapêr mar prãm kêt xwÿnh piitã
mẽ hpãm. Jakamã na pa hte mẽ kãm tanhmã Jejus
jarênh to. Kêp Tîrtûm Kra hã harê nê te kot Tîrtûm
kot amnhî̄ nhî̄pêx pyrâk ã harênh o ri ixpa. Hãmri
nhûm Satanasti tee ri ja hã ixpumu nhûm ja kêp
omnuj nê. Jakamã nhûm tanhmã Tîrtûm nê mẽ
hkrã hto nê te mẽ hamak pro pyrâk o mẽ hipêx.
Mẽ kot hprî̄ hã Jejus jarênh mar nê hkôt amnhî̄
xunhwÿr pymaj nhûm ã nê mẽ hipêx anê. Jejus
jarênh te kêp kanê hpôk mex pyrâk jakamã mẽ
kot mar kêt xwÿnhjaja te kamât kô kamã ri mẽ pa
pyrâk. No nhûm Satanasti tãm kot nê mẽ no kupyr
jakamã nhûm htem ã ri kamât kô kamã mẽ pa
pyrâk o amnhî̄ nhî̄pêx anê.

Amnepê mã kormã mẽmoj kêt ri nhûm kamât kô
pix. Tã nhûm Tîrtûm tanhmã kapêr to nê kapêr o:

—E kê hirã kato. Anê.

Hãmri nhûm ra kapêr xà hkôt hirã kator kurê
kumrêx. Tã ja pyrã nê na pa pre kamât kô kamã
ixtÿx ri ixpa pyrâk nhûm Tîrtûm te kot inhmã
kanê hpôk nhûm hirã pyrâk o inhî̄pêx pa mex o
mex ã omunh kurê kumrêx. Hãmri nê Jejus Kris
kot amnhî̄ nhî̄pêx ã omu nê te Tîrtûm kot amnhî̄
nhî̄pêx ã omunh pyrâk. Wa kot amnhî̄ nhî̄pêx te kot
axpên pyrâk.

Nê na pa hte pam tanhmã amnhî̄ jarênh to ho ri
ixpa hkêt nê. ãm Jejus Krisja pix na pa hte harê.
Tapxipix na kêp mẽ panhõ Pahihti. Jakamã hkĩnhã

te ixpê mẽ amã ixàpênh xwỳnh pyràk o na pa hte mẽ amã kapêr jarênh o ri mẽ akôt ixpa.

*Pawre te kêp poti gràre nhĩpêx pyràk ã harênh
Wam Korî̄t 2.4-5; Sikûn Korî̄t 11.23, 12.9*

⁷ Nê Tĩrtũm ixrom hihtỳx o hihtỳx. No pa na hkĩnhã ixihỳx kêt. Te ixpê poti gràre nhĩpêx pyràk jakamã na pa hte Tĩrtũm xihỳx xwỳnh pix nhỹ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ỹ hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸ Na pa hte mẽ hkôt mẽ kãm Jejus jarênh o ri ixpa nhũm mẽ hkwỳja tōhã inhma nê ja hã inhĩpêx kati nê pa amnhĩ xà htỳx kamã ama. Nom nhũm Tĩrtũm mẽ kutã tanhmã ixkrã hto pa inhmã amnhĩ xà kamã ijamak pyma hkêt nê arĩ mẽ kãm kapêr jarênh o ri mẽ hkôt ixpa. Nê amnhĩ kaxyw Jejus kôt pix mã ijamaxpêr tỳx rãhã pê tee ri amnhĩ kukamã ijamaxpêr o ri ixpa hkêt nê.

⁹ Nê mẽ kãm ixkurê xwỳnhjaja ohtôô. Na htem xatã Jejus ã tanhmã ixtomnuj to htã pa kormã ixyk kêt nê. Na pa hte Tĩrtũm kamnàr rom arĩ mẽ hkôt ixpa nhũm Tĩrtũm ixkôt pa ho pa. ¹⁰ Na htem Jejus pyrà nê ixpĩr kaxyw tanhmã inhĩpêx to. No ãm ko. Kojã mẽ nhỹrmã ixpĩ rỳ ko. Ixte amnhĩ kukamã ixàhpumunh kêt. Kot paj ãm arĩ ixtĩr ri mẽ kãm Jejus jarênh o ri mẽ hkôt ixpa. Kêr kê mẽ hkwỳjaja ixkapêr ma nê axpên mã tanhmã Jejus jarênh to nê harênh o:

—Nà pêr ãm hãmri na pre Jejus akupỹm htĩr nê tanhmã hkwỳjê ho mex to. ãm hãmri na hte Pawre ja hã harê. Anê.

¹¹ Mẽ kot Jejus ã ixpîr mã tâ pa arĩ mẽ kãm akupỹm hĩr ã harẽ. Tĩrtũm na hte ja kaxyw tanhmã ixkrã hto pa arĩ mẽ kãm harẽnh o ri mẽ hkôt ixpa. ¹² Na pa pre ra mẽ amã harẽ ka prem inhma nẽ Jejus kôt amnhĩ xunhwỳr kurẽ kumrẽx nẽ amnhĩ nhĩpêx nyw o amnhĩ nhĩpêx o ri apa. Jakamã ixpyrà nẽ mẽ apê atĩr tũm nẽ apa mã xwỳnh. Nhũm htem piitã mẽ ate Jejus kôt amnhĩ xunhwỳr ã mẽ apumu. Tã nhũm mẽ kot Jejus ã ixpîr kaxyw. Nom kwār mẽ māmĩrĩ ixpĩ. Ja inhma tanhmã kute hkêt. Mẽ kot ixpîr mã tâ kot paj arĩ Jejus kapêr jarẽnh o ri ixpa rãhã ty. Ra mẽ kot ixkapêr mar nẽ Jejus kôt amnhĩ xunhwỳr xwỳnhjaja mẽ pahpyrà nẽ kêp hĩr tũm nẽ pa ho pa mã xwỳnh kênã. ¹³ Jakamã kwār mẽ māmĩrĩ ixpĩ. Na pa hte arĩ amnhĩ kaxyw Tĩrtũm kôt ijamaxpêr mex rãhã nẽ. Amnepê mã na pre Pahi finat Tawija tanhmã Tĩrtũm kapêr jarẽnh to nẽ harẽnh o:

Ãm hãmri na Tĩrtũm kapêrja. Hêx kêt jakamã na pa hte mẽ kãm harẽnh rãhã ho ri ixpa. Anẽ. Tã pa hte Tawi pyrà nẽ mẽ piitã mẽ kãm Tĩrtũm kapêr jarẽnh o ri ixpa. Tĩrtũm kot mẽ pamã tanhmã mẽmoj to hêx to hkêt. ¹⁴ Ra kot amnhĩ jarẽnh xà hkôt akupỹm Pahihti Jejus o hĩr jakamã kot puj mẽ nhỹrmã uràk nẽ ty nhũm akupỹm mẽ pahto mẽ pahĩr nẽ ma war amnhĩ wỳr mẽ pahto api.

¹⁵ Amnepêm na pa pre ma mẽ awỳr mỗ nẽ mẽ akôt mẽ amã Tĩrtũm kapêr jarẽnh o ri ixpa. Ka prem inhma nẽ Jejus kôt amnhĩ xunhwỳn nẽ ixpyrà nẽ Tĩrtũm mã mex o mex ã harẽ. Jakamã kwār mẽ māmĩrĩ Jejus ã tanhmã inhĩpêx to. Kojã mẽ gaa

ně rĩ mẽ hkwỳjaja mẽ pahpyrà mẽ Jejus kôt amnhĩ xunhwỳ mẽ Tĩrtũm mã mex o mex ã harẽ.

Pawre tee ri amnhĩ kukamã hamaxpěr kêt ã kot amnhĩ jarěnh

Rômãn 8.17; Sikûn Korîť 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpěr o ixkaprĩ mẽ ixpa hkêt mẽ. Mẽ kot Jejus ã tanhmã ixtomnuj to htãã pa hte ixãmnhĩx kapěr jarěnh o ri ixpa. Ra ixpigêt mẽ ixirerek o inhmôr tâ inhôpinh xà kaxwỳnh kãm ijamaxpěr o Jejus kôt amnhĩ nhĩpêx mex o mỗ. ¹⁷ Mẽ kãm ixkurê xwỳnhjaja na htem Jejus ã inhĩpêx kati htã ã inhĩpêx anhỹr japjê hkêt mẽ. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrêx mẽ ixpa ho ixpa. Mẽ kot ixtomnujja na mẽ ho apkati grêre no kot paj nhỹrmã Tĩrtũm mẽ Krata wa kuri inhmex kumrêx mẽ ixtĩr tũm mẽ ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpěr o ri ixpa hkêt mẽ. Ja koja tokyx hapêx. Na pa hte ãm nhỹrmã Tĩrtũm nhỗ krĩ kamã inhmex mẽ ixkĩnh rãhã ri ixpaja pix kukamã ijamaxpěr o ri ixpa.

5

Mẽ panhĩ nyw jarěnh

Pirĩpos 3.21; Sikûn Pêtre 1.13-14

¹ Nẽ mẽ panhĩja te kot tyrti hô ho ixkre pyræk. Na htem tyrti hô ho ixkre nhĩpêx nhũm gaa mẽ hapêx. Tã mẽ panhĩja na hte uræk mẽ hapêx tokyx anẽ. Na pu htem ri papa mẽ gaa mẽ pawej mẽ ty. Tã nhũm

Tîrtûm hpānhā mē pahpê hkrajê mā mē panhî nyw gō pu mē kuri ō krī kamā pamex kumrêx nē pahtîr tûm nē papa ho papa. ²⁻³ Na pu htem jar pahpunuj nē papa. Nē mē paxà nhi nē mē pahkaprî nē. Mē panhî htûmja te kot mē paxê htûm pyrāk jakamā na pu htem ty nē te paxê htûm kwrÿnh nē hpānhā nyw jagjênh pyrāk o amnhî nhîpêx. Tā na pu htem amnhî kukamā panhî nywja mā pajamaxpêr o ri papa. Kot pu mē kaxkwa kamā pahkarō pix nē ri papa hkê̄t nē. Mē panhî nyw ā kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhî htûm o pajapêx nē hpānhā panhî nyw ā mē papa hprām. Tā koja Jejus tokyx akupÿn wrÿk japêr pu mē pahtyk kêt rāhā tokyx panhî nywta o panhî nyw. Nom koja tokyx akupÿn wrÿk kêt japêr pu mē nhÿrmā ty nhûm Tîrtûm akupÿm mē pahto mē pahtîr nē mē pamā mē panhî nyw gō pu mē ho panhî nyw. ⁵⁻⁶ Na pre ra Tîrtûm mē panhî nyw kukamā hamaxpêr nē mē pahtā tanhmā amnhî jarênh to. Nē mē pahwÿr Karō rē nhûm mē pahkarō mā agjê pu mē ja hā amnhî pumu nē pahkînh nē pajamaxpêr o:

—Nà ra Tîrtûm kot ixwÿr amnhî Karō mēnh nhûm ixkarō mā àr jakamā koja mēānēn nhÿrmā inhmā inhî nyw gō. Kormā inhî htûm kamā ixpa nē Pahihti Jejus mē wa ō krī kamā ixpa hkê̄t tā koja nhÿrmā inhmā inhî nywja gō pa inhî nyw o wa kuri ixpa ho ixpa. Nà koja ā inhîpêx anē.

Anhÿr o pajamaxpêr pē pahkînh nē papa.

⁷ Nē mē pahte jar pano ho nhÿri Jejus pumunh kêt tā no ām panhōpinh xà kaxwÿnh kām kām pajamaxpêr mex nē. ⁸ Jakamā na pu mē tee ri

amnhĩ kukamã pajamaxpēr o papa hkêt nē. Na pu htem ãm tokyx mẽ pahtyk nē ma Pahihti Jejus nhõ krī hwȳr paxàpir jamār o papa. Ō krīja kēp mẽ papapxà kumrēx jakamã na pu htem ma hwȳr paxàpir pix kukamã pajamaxpēr rāhã nē. ⁹ No ãm mẽ pamã ja pix prām kêt. Na pu htem mãânēn pamã Jejus mã hprām xà hkôt nhȳri tanhmã kãm amnhĩ nhĩpêx to ho ri papa hprām o papa. Jar mẽ panhĩ htũm rāhã rȳ mūtār kuri ō krī mex kãm mẽ panhĩ nyw ã tanhmã kãm amnhĩ nhĩpêx to ho ri papaja na mẽ pamã hprām.

¹⁰ Nē na hte Krisja jar mẽ pahte tanhmã amnhĩ nhĩpêx to hã mẽ pahpumunh o hkrī. Mẽ pahte tãm amnhĩ nhĩpêxja nē mẽ pahte amnhĩ tomnujja nhũm hte hã mẽ pahpumunh rāhã ho hkrī. Tã koja nhȳrmã kot mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ panhĩpêx to. Mẽ pahte tãm amnhĩ nhĩpêx o ri papa xwȳnhjaja koja ra mẽ panê htyk kukwak ri mẽ pahto mex nē. No mẽ kot amnhĩ tomnuj o mẽ pa xwȳnhjaja koja mẽ homnuj tȳx nē. Jakamã na pa inhmã kãm hprām xà hkôt pix mã amnhĩ nhĩpêx o ixpa hprām nē.

Mẽ pajamaxpēr nyw jarēnh

Rômān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tĩrtũm kot hprī hã mẽ pahpumunh rāhã ho hkrī jakamã inhmã kãm hprām xà hkôt pix mã amnhĩ nhĩpêx o ri ixpa hprām. Mãn ka mẽ ra ja hã ixpumunh mex nē rȳ ko. Mẽ piitã mẽ kot hkôt amnhĩ xunhwȳr prām xà na pa hte mẽ kãm kapēr jarēnh o ri ixpa. ¹² Nom ixte ja hã amnhĩ to jarkrar o ri ixpa hkêt. ãm mẽ ate inhmar nē

mê kêp Kris nhỹ hã mê ahkre hã amnhĩ to hêx xwýnhjê mã tanhmã ijarênh to kaxyw na pa ã mê amã amnhĩ jarênh anê. Mê kot Tĩrtũm kapêr jahkre mex kumrêx ã amnhĩ to jarkrar tâ na htem hkôt amnhĩ nhĩpêx kêt nê. Tã mê ate aprĩ hã ixte Tĩrtũm kapêr kôt amnhĩ nhĩpêx mex ã íxpumunh nê tanhmã mê kãm ijarênh to kaxyw na pa ã te ixte amnhĩ to jarkrar pyræk o mê amã amnhĩ jarênh anê. ¹³⁻¹⁴ Mê kot íxkrã pipãnh ã ijarênh tâ Tĩrtũm na mê akaxyw íxãm pa hte mê amã kapêr jarênh o ri mê akôt íxpa. Íxkrã pipãnh kêt. Íxte Tĩrtũm kãm hprãm xà hkôt tanhmã amnhĩ nhĩpêx to xwýnh na pa. Tã mêmoo kaxyw na pa hte ã kapêr jarênh rũnh anhỹr o ri mê akôt íxpa? Nà inhmã mê akĩnh kênã. Mê ate Tĩrtũm kôt tãm amnhĩ nhĩpêx prãm xaj na pa hte ã mê amã kapêr jarênh anhỹr rãhã nê. Kris na pre tanhmã ixto pa inhmã mê akĩnh nê. Te tãm kãm mê ajapê pyræk. Na pre Kris amnhĩ grõnh kôt mê pahpiitã mê nê ty. Tĩrtũm kot mê pahte amnhĩ tomnuj mýrapê tanhmã mê pahto pymaj nhũm mê pahpiitã mê panê ty. Jakamã te mê pahpiitã Jejus kôt mê pahtyk pyræk o na pu htem amnhĩ nhĩpêx. Jao te mê pahte amnhĩ nhĩpêx tũmja mê pahpê hapêx par pyræk o pu mê amnhĩ nhĩpêx nyw o amnhĩ nhĩpêx o ri papa. ¹⁵ Mê pajamaxpêr nyw o tãm mê pahte amnhĩ nhĩpêx o papa kaxyw na pre Jejus mê panê ty. Jakamã na pu htem axte amnhĩ pix kukamã ri pamã mêmooj prãm o ri papa hkêt nê. Na pu htem mãânên Tĩrtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupỹm Kris o htĩr pu mê kukwak ri pajamaxpêr nyw o amnhĩ nhĩpêx o papa. ¹⁶ Jao mê piitã mê hkrã hkà hã mê omunh xà hkôt pix

mã tanhmã mẽ harênh to hkêť nê. Mẽ kot amnhĩ tomnuj ã mẽ harênh rỳ mẽ kot amnhĩ to mex ã mẽ harênh kêt nê. Amnepê mã na pa pre ã Kris jarênh anê nê harênh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. Ấm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhỹr ã harênh o ixpa. Tã axte ã harênh anhỹr hkêť nê. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

*Mẽ pahpê Tĩrtũm kràmnhwỳ hã mẽ pajarênh
Rômãn 5.1, 5.10; Epes 6.20; Korosẽ 1.20*

¹⁷ Nê koja mẽhõ Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr. ¹⁸ Tĩrtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwýnhjê ho hkràmnhwỳ. Hãmri nê tanhmã mẽ pahte amnhĩ nhĩpêx to hã mẽ pamã karõ nê mẽ pamã:

—E kêr ka mẽ ma krĩ piitã hkôt ri mẽ kãm ixkapêr jarênh o ri apa kê mẽ ama nê mẽ apyrà nê Kris kôt amnhĩ xunhwỳ. Pa ja hã mẽ omu nê ixte mẽ anhĩpêx pyrà nê mẽ ho ixkràmnhwỳ. Anê.

¹⁹ Jakamã na pa hte ma mẽ kãm kapêr jarênh o ri mẽ hkôt ixpa nê mẽ kãm:

—E pa mẽ amã mẽmoj mex jarê ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nê htyk o Tĩrtũm mã mẽ pahpãnhã

amnhîrer par kumrêx. Jakamã na ra Tîrtûmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwỳ kê Tîrtûm kot inhĩpêx pyrà nê mẽ ato hkra nê mẽ ato hkràmnhwỳ.

Anhỹr o mẽ kãm harênh o ri mẽ hkôt ixpa. ²⁰ Kris kot mẽ apiitã mẽ awỳr inhmênh jakamã na pa hte y hã mẽ amã kapêr jarênh o ri mẽ akôt ixpa nê mẽ amã:

—E Tîrtûm kãm mẽ ajapê jakamã na mẽ awỳr inhmê pa mō. Jakamã kwa mẽ tokyx amnhĩ tomnuj kaga nê hkôt amnhĩ xunhwỳ. Kê amnhĩ tã mẽ apumu nê mẽ ato hkràmnhwỳ. Anê.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tîrtûmja te mẽ kot amnhĩ tomnuj tỳx kumrêx xwỳnh pyràk o hipêx. Tã mêmō kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwỳr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwỳnh pyràk o mẽ panhĩpêx kaxyw na pre ã mẽ panê Krata nhĩpêx anê.

6

¹ Tã kot ã Kra nhĩpêx anhỹr jakamã kwa mẽ ixkapêr ma nê mar tỳx nê. No mẽ ama nê ãm mar kêt nê. Tîrtûm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarênh anhỹr o ri mẽ akôt ixpa.

² Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhî to ixwỳ
pa pre mẽ ama nê mẽmojta pê mẽ apytà nê
mẽ ato mex nê. Anê.

Jakamã kwa mẽ inhma. Tîrtûm kãm mẽ ate amnhî
tomnuj pê mẽ apytâr prãm tỳx jakamã kwa mẽ
tokyx amnhî to awỳ kê ã kêp mẽ apytâr anê.

*Mẽ kot Kris ã tanhmã Pawre nhîpêx to hã mẽ
harênh*

Sikûn Korît 4.7, 11.23-33; Korosê 1.10

³⁻⁴ Nê mẽ kot Tîrtûm kapêr mar nê hã ixtomnuj
tã pa hte amnhî katut kôt mẽ kot tanhmã ixtomnuj
toja rê nê ho ijamakêtkati tokyx anê. Nê arî mẽ
kãm kapêr jarênh rãhã ho ri mẽ hkôt ixpa. Mẽ kot
mar nê ãm mar nê hkaga pymaj na pa hte ã amnhî
nhîpêx anhỳr rãhã nê. Mẽ kot ja hã inhîpêx punuj
tã pa arî mẽ kãm harênh o ri mẽ hkôt ixpa. ⁵ Mẽ kot
Kris ã ixtak nê ijagjênh nê tanhmã ixto kaxyw ixtã
htu htã pa hte mẽ kutã amnhî to htỳx nê ixkuhê.
Na pa pre hte Tîrtûm mã mẽ kãm kapêr jarênh rax
nê. Jao tōhã inhôt kêt nê inhôtıwa ho ri mẽ hkôt
ixpa. Nê tōhã inhmã prãm tỳx nê ri ixpa. Tã no ãm
arî mẽ kãm kapêr jarênh rãhã nê. ⁶ Inhmã tanhmã
ixte amnhî tomnuj to hprãm kêt. Inhmã Tîrtûm kot
amnhî nhîpêx kôt pix mã amnhî nhîpêx prãm. Nê
inhmã inhgryk tokyx anhỳr prãm kêt. ãm inhmã
mẽ piitã mẽ hkĩnh kãm mẽ ho mex pix prãm. ã na
pa hte Tîrtûm Karō nhỹ hã amnhî nhîpêx anhỳr o ri
mẽ hkôt ixpa. Mẽ kot ja hã ixpumunh nê ra Tîrtûm
kapêr ma nê hkôt amnhî xunhwỳr kaxyw. ⁷ Na pa
hte ixkatat kôt mẽ kãm ixkapêr mex pix nê. Tîrtûm
xihtỳx xwỳnhja nhỹ hã ri mẽ kãm kapêr jarênh jao
tãm amnhî nhîpêx nê tãm ri ijamaxpêr o ri mẽ hkôt

ixpa. Jakamã na htem ja hã ixpumu nẽ ixte Tĩrtũm kapẽr jarẽnh ma nẽ hkõt amnhĩ xunhwỳ. ⁸ Na hte mẽ hkwỳjaja kãm ixkĩnh nẽ nhũm mẽ hkwỳjaja axtem kãm ixkurẽ nẽ. Nẽ mẽ hkwỳjaja amnhĩm inhmex ã ijarẽ nhũm mẽ hkwỳjaja axtem axpẽn mã tanhmã ixto kapẽr punuj to. Mẽ kot ixêx nhi hã ijarẽnh tã pa hte ixkatàt kõt mẽ kãm ixkapẽr o ri ixpa. Nom kwãr mẽ mãmri tanhmã ri ixto kapẽr to. Ja tanhmã inhmã kute hkêt. ⁹ Na hte mẽ hkwỳjaja ixkamã ôkre kahak nẽ pika piitã hkõt axpẽn mã tanhmã ijarẽnh to ho pa. Mẽ kãm ixpĩr prãm tã no pa arĩ ixtĩr nẽ ixpa. Mẽ kot Jejus ã ixtomnuj tỳx tã kormã ixpĩr kêt nẽ pa ri ixtĩr nẽ ixpa. ¹⁰ Ixte Kris ã amnhĩ xã htỳx kamã ijamak o ri ixpa htã arĩ ixkĩnh nẽ ixpa. Nẽ ixkàxpore hkêt tã nhũm mẽ ohtô nẽ ixte mẽ kãm Jejus kapẽr jarẽnh kukwak ri mex nẽ pa. Nẽ ixkukrẽx rax kêt tã nhũm Tĩrtũm ixto mex nẽ pa inhmex nẽ ixpa. Tã kot paj nhỹrmã ô krĩ kamã kuri inhmex kumrẽx nẽ ixtĩr tũm nẽ ixpa ho ixpa. Jakamã na pa hte arĩ mẽ kãm Jejus kapẽr jarẽnh o ri mẽ hkõt ixpa. ¹¹ E Korĩť kãm ixkràmnhwỳjaja. Na pa ixprĩ hã mẽ amã amnhĩ nhĩpêx jarẽnh par kumrẽx. ¹² Inhmã mẽ akĩnh tỳx tã te mẽ amã ixkĩnh kêt pyràk. ¹³ Kwa te mẽ ate ixto mẽ akatut nẽ akuhẽ pyràk o inhĩpêx kêt nẽ. Amnhĩ pyrà nẽ amã ixkĩnh nẽ hkêt wehe. Te mẽ apê ixkra pyràk o na pa ã mẽ amã ixkapẽr anẽ.

Te mẽ pahpẽ Tĩrtũm nhõrkwỹ pyràk ã mẽ pajarẽnh Wam Korĩť 10.20-22, 15.33; Epes 5.3-14; Sikũn Ximotre 2.4; Xiakre 4.4-5; Wam Pẽtre 2.11, 4.1-6

¹⁴ Nẽ kẽr ka mẽ kot Kris kõt amnhĩ xunhwỳr kêt xwỳnhjẽ mẽ mẽ mẽmoj tã tanhmã axpẽn mar to

hkêt nê. Rỳ mēhō ho amjên rỳ mēhō ho aprō hkêt nê. Ahp̃yñhã mē pajamexpēr kēnã. Tanhmã kot we mē hamaxpēr nyw xwýnhjaja nê mē hamaxpēr tũm xwýnhjaja amnhĩ to nê axpēn kôt hamaxpēr nê ri axpēn kôt pa? Nà koja mē ã amnhĩ nhĩpêx anh̃r kêt nê. Ahp̃yñhã mē pajamexpēr. Na hte hirã ht̃yxa kamàt kô mē pihkàr kêt nê. ¹⁵ Xà na hte Kris mē Satanasti wa axpēn kôt hamaxpēr? Nà wa kot axpēn kôt hamaxpēr kêt. Ahp̃yñhã wa hamaxpēr nê ahp̃yñhã wa kot amnhĩ nhĩpêx. Nê ahp̃yñhã hirã nê ahp̃yñhã kamàt kô. Nê mē pahpê Kris kw̃yja nê mē kēp hkwỹ hkêt xwýnhjaja ahp̃yñhã mē pajamexpēr nê ahp̃yñhã mē pahte amnhĩ nhĩpêx. ¹⁶ Na pu htem Tĩrtũm mã amnhĩ jarēnh xà hã ixkre kamã sãnti xunhw̃r nê amnhĩ to hw̃r pē kām mex o mex ã harēnh kêt nê. Axtem na sãntija. Mē panhō Tĩrtũmja sãnti rom h̃ir tũm rāhã nê pa ho pa xwýnh. Nê mē papajaja te mē pahpê Tĩrtũm nhōrkwỹ pyrāk. Kapēr ã kagà htũm kot ja jarēnh kot:

Ixkrajaja te kēp inhōrkwỹ nhũm ixpê õ dōn pyrāk.

Te ixpê inhōrkwỹ kamã ixpa xwýnh pyrāk
jakamã kot paj ixkrajê kamã ri ixpa ho ixpa.

Ixpê Mēhpām na pa. Anê.

¹⁷⁻¹⁸ ã Tĩrtũm xiht̃y xwýnhja kot amnhĩ jarēnh anh̃r jakamã na hte mē kot amnhĩ tomnuj xwýnhjê nê mē pahkurê ho:

Kēr ka mē hkôt ri apa hkêt nê. Kwarĩ ho kwarĩ.

Nê mē hkôt ri amnhĩ nhĩpêx o apa hkêt nê.

Kot kaj mē ixkapēr ma nê ixkôt amnhĩ nhĩpêx hã
kot paj amnhĩ w̃r mē aw̃y nê mē ato ixkra.

Nê pa kot paj ixpê Mēapām maati. Anê.

7

¹ Tã ã Tĩrtũm kot mẽ pahto hkra nẽ mẽ pahkõt pa ho pa hã amnhĩ jarẽnh kot anhỹr jakamã kwa ixkràmnhwỳjaja. Kêr pu mẽ kapêr ma nẽ tanhmã amnhĩ tomnuj to hkêt nẽ. Nẽ mẽmoj punuj kukamã pajamaxpêr kêt nẽ. Nẽ ãm kapêr kôt pix mã amnhĩ nhĩpêx mex rãhã nẽ.

Pawre kot Korît nhõ xwỳnhjê nhỹ hã hkĩnh ã harẽnh

² Nẽ kwa Kris kôt ixtõ nẽ ixtõxjaja. Kêr ka mẽ tee ri amnhĩ tã tanhmã inhmã ajamaxpêr to hkêt nẽ. Na pa pre tanhmã mẽ atõ hto hkêt nẽ. Rỳ tanhmã mẽ atõ hto ka mẽ ja hã ixpumu nẽ ixkôt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkôt ajamaxpêr kêt wehe.

³ Mẽ ate inhmar nẽ amnhĩ tã apijaàm kaxyw na pa ã mẽ amã ixkapêr anhỹr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarẽnh rax nẽ. Inhmã ri mẽ akôt ixpa rãhã ho ixpa hprãm. Rỳ ka mẽ nhỹrmã apiitã apikaprâr par japêr pa inhmã mẽ akôt ixtyk prãm nẽ. ⁴ Na pa hte ra mẽ amã ijamaxpêr pẽ ixkĩnh nẽ ixpa. Nà kot kaj mẽ ixkapêr ma nẽ Jejus kôt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỹr rãhã nẽ. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamaxpêr nẽ ixkĩnh nẽ.

⁵ Nẽ na pa pre amnẽ Masetõn wỳr kormã Xitre japêr o mỗ. Hãmri nẽ Masetõnja wỳr pỏj nẽ hapêr pẽ mẽ kãm Jejus kapêr jarẽnh o ri mẽ hkôt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nẽ hã inhmã àkjer pix o pa. Hãmri

nê ma Masetôn kamã krî piitã hkôt ri mẽ kãm ixto kapêr punuj nê pa amnhî tã mẽ mar o ri mẽ hkôt ixpa. Nê mẽ kajaja mẽ ate Kris kaga nê nhãm mẽ hamaxpêr kôt amnhî nhîpêx pymaj na pa pre tee ri mẽ akukamã ijamaxpêr o ri mẽ hkôt ixkaprî nê ixpa. ⁶ Tã Tîrtûm kêp mẽ hkaprî xwýnhjê pumunh nê akupÿm mẽ ho mẽ hkînh xwýnh jakamã na pre ixkaprî hã ixpumu nê ixwÿr Xitre mẽ. Pa pre omu nê akupÿm ixkînh nê tãm ijamaxpêr. ⁷ No âm Xitre pumunh kôt pix mã ixkînh kê. Na pre ixwÿr pôj nê tanhmã inhmã mẽ ajarênh to nê mẽ ate tanhmã ho mex to hã mẽ ajarê. Nê mẽ amã ixpumunh prãm tÿx ã mẽ ajarê. Nê Kris kôt mẽ atôta hpijaàm kê o pa nhũm ixte kagà kamã hã mẽ amã ixàkjêr nhũm mẽ ate ja hã omunh nê ra amnhî kamã apijaàm o akaprî htÿx ã mẽ ajarê. Nhũm Tîrtûm kot inhnê mẽ kãm ixkurê xwýnhjê pumunh mex kaxyw mẽ ate ixto hwÿr ã mẽ ajarê. Na pre ã inhmã mẽ ajarênh anê pa kuma nê mẽ anhÿ hã ixkînh tÿx kumrêx.

⁸⁻⁹ Nê wam ixte mẽ amã kagàta nhîpêx kê ri na pa pre tee ri mẽ ate amnhî nhîpêx ã mẽ ajarênh ma nê mẽ akaxyw hipêx. Nê kamã mẽ ate hpijaàm kê xwýnhhta kot tanhmã amnhî nhîpêx to hã omunh nê âm omunh o arî hkôt apa hã kagàta kamã mẽ amã akir hãmri nê Xitre mã kugô nhũm kupy nê ma mẽ awÿr o mō. Tã ka xep prem kamã harê nê ama nê amnhî kamã apijaàm nê. Nê akaprî nê ajamaxpêr o:

—Hêxta waa nê. Âm hãmri na Pawre ã mẽ ijarênh anê. Na pa mẽ ã amnhî nhîpêx anê nê amnhî tomnuj tÿx nê. Anê.

Tã nhũm Xitre akupÿn ixwÿr pôj nê inhmã mẽ

ajarê. Pa mẽ ajarênh ma nê tee ri ijamaxpêr nê ijamaxpêr o:

—Hêxta waa nê. Mon pa pre axtem nê ã ri mẽ kãm ixàkjêr anê? Nà na xep prem kagàta kamã harê nê kuma nê hkaprî htỳx nê. Anê.

Tã ãm hãmri na pa pre ã mẽ akaxyw hipêx nê mẽmojta ã mẽ amã ixàkjêr anê. Na ka xep prem kamã harê nê ama nê tee ri ajamaxpêr o ra akaprî nê. Nom Tîrtûm kãm hprãm xà hkôt na ka prem ja hã amnhî pumu nê ã akaprî anê. Tã xep ra akupỳm tãm amnhî nhîpêx nê akupỳm Tîrtûm kôt amnhî nhîpêx mex nê. Jao akupỳm akînh nê ri apa. Jakamã ãm hãmri na pa pre mẽ awỳr wam kagàta mẽnh nê mẽmoj tã ã mẽ amã ixàkjêr anê.

¹⁰ Koja Tîrtûm krajê hõ tanhmã amnhî tomnuj to. Hãmri nê tee ri ja hã amnhî pumu nê amnhî kamã hpijaàm nê akupỳm Tîrtûm kôt tãm amnhî nhîpêx. Hãmri nê akupỳm mex nê tãm hamaxpêr pê hkînh nê ri pa. Nê axte tee ri amnhî kukamã hamaxpêr hkêt nê. Ja na Tîrtûm kãm hprãm. Tã koja mẽ kêp hkra hkêt xwỳnhjê pyrà nê tanhmã amnhî tomnuj to nê ra hpijaàm japêr. Nom hkwyjaja kot ja hã omunh pix mỳrapê hpijaàm nê arî Tîrtûm kôt amnhî nhîpêx kêt japêr. Hã koja nhỹrmã ty nê Tîrtûm kra kot akupỳm hkôt tãm amnhî nhîpêx xwỳnhjê kînhã Tîrtûm pê awry rax kumrêx nê ri pa.

¹¹ Mẽ pahte Tîrtûm kapêr kwỳm ri tanhmã amnhî nhîpêx to hã tee ri amnhî pumunh nê amnhî kamã hpijaàm nê akupỳm tãm amnhî nhîpêxja na Tîrtûm kãm hprãm. Tã na ka xep ã amnhî nhîpêx anê. Wam ixte mẽ awỳr kagà mẽnhta na ka xep prem kamã tanhmã ixte nã

puro kamã hpijaàm kêt xwýnhṭa ã mẽ amã ixàkjêr tota kamã akapêr nê ama. Hãmri nê tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamaxpêr nê amnhĩ kamã apijaàm nê. Nom Tĩrtũm kãm hprãm xà hkôt. Mẽ ate jam ajamaxpêr pê amnhĩ kamã apijaàmja na kãm hprãm. Tã ka mẽ hpijaàm xwýnhṭa kamã agryk nê kãm akapêr o:

—Kwa mẽ pahpê Jejus kwýjaja mẽ pahte ã amnhĩ nhĩpêx anhỹr kêt tã ka ã amnhĩ nhĩpêx anê. Nà na ka amnhĩ tomnuj tỳx kumrêx. Kot kaj ã amnhĩ nhĩpêx anê pa mẽ hã apumu nê gaa nê apyrà nê ã amnhĩ tomnuj anê. Kwa ja kaga nê axte ã amnhĩ nhĩpêx anhỹr kêt nê. Nê akupỹm Tĩrtũm kôt amnhĩ xãm tỳx nê hkôt amnhĩ nhĩpêx rãhã ho ri apa. Anê.

Hãmri nhũm krĩ nhõ xwýnhjaja ja hã mẽ ajarênh ma nê mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anê.

¹² Nê ixte mẽ awýr kagà nê mênhta kamã na pa pre nã puro kamã hpijaàm kêt xwýnhṭa mã tanhmã ixàkjêr to hkêt nê. Rỳ nã purota mã tanhmã ixàkjêr to hkêt nê. Na pa pre mẽ apê Kris kwýjê hwýr kagà nhĩpêx nê kamã tanhmã mẽ amã hpijaàm xwýnhṭa ã karõ hto. Mẽ ate kamã harênh hãmri nê inhỹ hã amnhĩ nê hanor nhũm Korîṭ nhõ xwýnh piitã kot ã mẽ ate amnhĩ nhĩpêx anhỹr ã mẽ apumunh kaxyw. Nê mẽ ate Tĩrtũm nom ã hipêx anhỹr jao mẽ amã ixkĩnh pê ixkapêr kôt ã hipêx anhỹr ã amnhĩ pumunh kaxyw.

¹³ Tã nhũm Xitre ixwýr pøj nê tanhmã inhmã mẽ ajarênh to. Na xep pre mẽ awýr nojarêṭ nê tee ri

amnhĩ kukamã hamaxpêr. Mẽ ate kagàta kamã harênh nẽ ijarênh mar nẽ kamã agryk pymaj tee ri amnhĩ kukamã hamaxpêr. Tã ma mẽ awỳr mōn pōj nẽ mã amã kugō. Ka xep prem kamã harê nẽ ama nẽ hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nẽ hkĩnh nẽ. Hãmri nẽ tãm hamaxpêr. Tã ra akupỹn ixwỳr mō nẽ inhmã mẽ ajarê pa mẽ ajarênh ma nẽ ijaxwỳja ixkĩnh nẽ. ¹⁴Na pre kormã mẽ awỳr nojarê pa kãm tanhmã mẽ amex ã mẽ ajarênh to. Tã nhũm xep ma mẽ awỳr mōn pōj nẽ mẽ apumu nẽ hamaxpêr o:

—Nà pêr ãm hãmri na pre Pawre inhmã mẽ mex ã harê. Mẽ mex kênã. Anẽ.

¹⁵Tã nhũm pre mẽ arũm kato nẽ ra man akupỹn ixwỳr mōn pōj nẽ inhmã mẽ ajarênh o:

—Na pa pre ma mẽ hwỳr mō nẽ mẽ kãm ixkapêr o ri mẽ hkôt ixpa nhũm mẽ ixkapêr ma nẽ ixkôt amnhĩ nhĩpêx kurê kumrêx nẽ ixto mex nẽ. Kormã ixte mẽ hwỳr inhmōr kêt tã mẽ harênh ma nẽ inhmã mẽ hkĩnh nẽ. Tã pa ma mẽ hwỳr mō nhũm mẽ ixto mex rax nẽ pa ra inhmã mẽ hkĩnh tỳx kumrêx. Anẽ.

¹⁶Ã inhmã mẽ ajarênh anẽ pa mẽ ajarênh ma nẽ ixkĩnh tỳx nẽ. ãm hãmri na ka htem mẽmoj tã amnhĩ jarênh xà hkôt tanhmã amnhĩ nhĩpêx to ho apa.

8

Mẽ kot Kris kôt mẽ hkwỳjê pê õxy hkêt ã mẽ kãm karō

Atre 11.27-30; Rōmãn 15.25-27; Wam Korît 16.1-4

¹ E Kris kôt ixkwỳjaja. Kot paj hpānhā mẽ amā jar Masetōn kamā tanhmā Jejus kwỳjaja kot amnhĩ nhĩpêx to hā mẽ harê ka mẽ harēnh ma. Na hte Tĩrtũm mẽ kutā nojarêt nhũm mẽ mex nê pa.

² Mẽ hkwỳjaja kot Kris ã mẽ hipêx kati nhũm mẽ kot amnhĩ xà htỳx kām hamak o pa htā hkĩnh nê hamakêtkati nê ri pa. Nê mẽ hkàxpore hkryre htā ho õxỳ hkêt nê pa. Na htem àmnhĩx ri mẽ kêp amrakati xwỳnhjê mã hkwỳ nhõr o pa.

³⁻⁴ Tã na prem Jerujarê kamā Kris kôt mẽ pahkwỳjê jarēnh ma. Mẽ kêp amrakati hā mẽ harēnh ma nê kām mẽ hkaprĩ nê. Nê mẽ kām mẽ hwỳr mẽmoj rēnh nê mẽ ho ajuta hprām nê. No âm pa ixte mẽ kām hā karō xà hkôt kêt. Mẽ tāmjaja mẽ hamaxpêr xà hkôt na prem ã hamaxpêr anê nê mẽ kaxyw kàxpore ho pikuprõnh rax nê. Hāmri nê inhmā kugõ nê inhmā:

—Kwa na pa prem Jerujarê kamā Kris kôt mẽ pahkwỳjê jarēnh ma nê mẽ inhmā mẽ hkaprĩ nê mẽ kām mẽ ixkàxpore hkwỳ ho akuprõ. Jakamā e amỳ nê ma mẽ hwỳr o mỗ nê mẽ kām agõ kê mẽ tokyx ho amnhĩm awjaprô nê kuku. Anê.

⁵ Pa mẽ kuma nê ixtỳx ho âm kàxpore grire hā hkamnhĩx nê ijamaxpêr o:

—Kwa mo mẽ hikàxpore rax koja mẽ ri ho akuprõ nê mẽ kām kugõ? âm mẽ hikàxpore hkryre kênã.

Anhỹr o ijamaxpêr tã no nhũm mẽ kaxyw ho rax nê ho akuprõ. Mẽ hikàxpore hkryre htā mẽ kām õr rax nê. Hāmri nê inhmā amnhĩ jarēnh o:

—Na pa mẽ ra Pahihti Jejus Kris mã amnhĩ gõ. Mẽ ixte tanhmā kām amnhĩ nhĩpêx to ho ri ixpa kaxyw. Jakamā e tanhmā mẽ inhmā mẽmoj tã

karõ hto. Kot pa mẽ ama nẽ akapěr kôt amnhĩ nhĩpêx. Ja na pa mẽ inhmã hprãm nhũm Tĩrtũm haxwỳja kãm ja prãm. Anẽ.

⁶ Na pa pre ã mẽ kot amnhĩ nhĩpêx anhỹr ã mẽ omu nẽ mẽ apê Korĩť nhõ xwỳnhjê mã ijamaxpěr kurê kumrêx. Hãmri nẽ Xitre mã mẽ ajarẽ. Na pre mẽ awỳr mỗ nẽ mẽ amã Jerujarẽ nhõ xwỳnhjê jarẽ. Mẽ ate mẽ kãm kàxpore hkwỳ ho apikuprõnh kaxyw. Tã pa pre jam ijamaxpěr nẽ ra akupỹm mẽ awỳr mẽn h mã nẽ kãm:

—Kwa ma akupỹm Korĩť wỳr mỗ nẽ mẽ kãm anẽ kê mẽ ra kot amnhĩ jarẽn h xà hkôt Jerujarẽ nhõ xwỳnhjê kaxyw kàxpore hkwỳ ho akuprõ nẽ tokyx mẽ hwỳr kumẽ. Ra mẽ kãm Kris kôt mẽ hkwỳjê hkĩnh ã amnhĩ jarẽn h kênã. E kwa tokyj. Anẽ.

⁷ Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpěr tỳx nẽ. Nẽ ma mẽ kãm Tĩrtũm kapěr jarẽn h mex o ri mẽ hkôt apa. Nẽ mẽ ajamaxpěr mex nẽ. Nẽ mẽ piitã mẽ ho mex o ri apa. Nẽ mẽ amã ixkĩnh o ri apa. Jakamã kwa kêr ka mẽ axàmnhĩx mẽ kêp amrakati xwỳnhjê mã mẽ akàxpore hkwỳ nhõr o apa. Jao mẽ amã Tĩrtũm kĩnh tỳx ã amnhĩ to amnhĩrĩť. ⁸ Ixte ã mẽ amã ja hã karõ anhỹr tã hã mẽ atã ixihtỳx kêt nẽ. ãm mẽ kamã axukapri hkôt mẽ ate mẽ kãm axàmnhõr o apa kaxyw na pa ã mẽ amã ixkapěr anẽ. Masetõn kamã mẽ pahkwỳjaja kot amnhĩ nhĩpêxta pyrà nẽ. ⁹ Ra mẽ ate Jejus Kris kãm mẽ pajapê hã kot tanhmã amnhĩ nhĩpêx to hã mar mex. Amnepem na pre kaxkwa kamã mex kumrêx nẽ ri pa ho pa nhũm mẽmoj piitã kêp õ htã nhũm rer pa nẽ mẽ pahwỳr wrỳ nẽ mẽ pakamã kêp amrakati nẽ ri pa.

Hikàxpore hkêť nê ri pa. Tã mẽmo kaxyw na pre ã mẽmoj mex piitã rer par nê mẽ pahwỳr wrỳk anê? ãm kot mẽ pahto mex pix kaxyw. Kot mẽ pahto mex nhũm mẽ pahte kukwak ri mẽ paxàmnhĩx ri mẽ pajamakêtkati nê mẽ papa kaxyw na pre ã amnhĩ nhĩpêx anê. Mẽ pahte nhỹrmã uràk nê kaxkwa kamã pamex kumrêx nê ri papa ho papa kaxyw.

¹⁰ E kwa kêr ka mẽ tokyx kàxpore hkwỳ ho apikuprõnh pa nê Jerujarê nhõ xwỳnhjê hwỳr amê. Mẽ akumrêxjaja na ka prem ham amgrà hapêxta kamã ra mẽ kaxyw ho apikuprõnhja krax. Mẽ amã mẽ ho mex prãm xàj ham ho hkrax tã no ãm kormã hatur xàm mênh nê mẽ hwỳr mênh kêt nê. ¹¹ Kwa mẽ tokyx ja ho ajapêx nà. Na ka prem ate ho anhỹr krax ã akĩnh pê kàxpore hkwỳ ho apikuprõnh o apa. Tã kêr ka mẽ arĩ akĩnh rãhã ho apikuprõnh par jatur xàm amê. No mẽ ri atỳx tanhmã ajamaxpêr to hkêť nê. Rỳ mẽ ajamaxpêr o:

—Nà kormã. Kot paj nhỹrmã ixkàxpore rax nê rĩ kormã mẽ hwỳr hkwỳ mẽ.

Anhỹr o mẽ ri ajamaxpêr hkêť nê. Mẽ ate tanhmã akàxpore hkre kamã kute hã omunh xà hkôt mẽ kãm hkwỳ pix gô. ¹² Kêr ka mẽ axàmnhĩx akĩnh kãm mẽ kãm ho akuprõ. Ate amnhĩ kàxpore pumunh xà hkôt. Ka mẽ akàxpore rax nê mẽ kãm ho rax nê agô. Rỳ mẽ akàxpore grire nê mẽ kãm ho grire nê agô. Ja na kêt mex. ¹³ No mẽ ate mẽ kãm ôr par nhũm mẽ arom mẽ hikàxpore rax nê ri paja mex kêt. ¹⁴ Nom ra mẽ akàxpore rũnh jakamã kwa mẽ amnhĩ kutã mẽ kãm hkwỳ ho hkryre nê ho akuprõ kê mẽ apyrà nê hikàxpore nê ri pa.

Kêr ka mẽ nhỹrmã tanhmã amnhĩ to nẽ axà nẽ nhũm akàxpore apê hapêx nhũm mẽ ajarênh ma nẽ amnhĩ kuxwar mẽ ato ajuta nẽ mẽ amã hkwỳ ho akuprô nẽ mẽ awỳr kumẽ. Ka mẽ akàxpore ho axpẽn pyrà nẽ ri apa. ¹⁵ Amnepêm Tĩrtũm kot kaxkwa rũm Ijaewjê hwỳr mẽõ rênh nhũm mẽ kot apkati mẽ amnhĩm hkawrà nẽ ho apkur o pata ã na pre Tĩrtũm kapêr ã kagà htũmja ã mẽ harênh anẽ nẽ mẽ harênh kot:

Na pre mẽ hkra xohtô xwỳnhjaja mẽ apkur xà hkawrà rũnh nẽ. Nẽ gôj kãm unhwỳ nẽ kuku nẽ piitã ho ôhy htũ. Nhũm mẽ hkra grêre xwỳnhjaja haxwỳja hkwỳ kawrà no ãm ho hkryre nẽ hkawrà. Nẽ gôj kãm unhwỳ nẽ kuku nẽ haxwỳja ho ôhy htũ hpa. Na pre htem apkati mẽ ã amnhĩ nhĩpêx anhỹr o pa. Anẽ.

Ja pyrà nẽ kêr ka mẽ akàxpore ho axpẽn pyràk o ri ho apa.

Xitre mẽ hkràmnhwỳjê jarênh

¹⁶ Nẽ Xitre na pre ixpyrà nẽ kãm mẽ ato ajuta hprãm nẽ. Na pre inhmã mẽ atã amnhĩ jarê pa pre kuma nhũm ja inhmã mex nẽ pa ixkĩnh nẽ. Nẽ ijamaxpêr o:

—Nà ãm hãmri na Tĩrtũm tanhmã Xitre hkrã hto nhũm ã hamaxpêr mex anẽ. Anẽ.

¹⁷ Tã pa ma akupỹm mẽ awỳr mõi ã hkukja nhũm inhma nẽ hkĩnh nẽ mẽ awỳr nojarêr kurê kumrêx. Nom kormã ixte kãm mẽ ajarênh kêr ri nhũm tãm amnhĩ kukamã hamaxpêr nẽ mẽ awỳr hkrã. ¹⁸ Tã na ra nojarêr kaxyw. Kot paj ma hkôt Kris kôt mẽ pahtôjê hõ mẽ kê ma hkôt mõi. Kôt ixte mênh xwỳnhta na hte mẽ kãm Tĩrtũm kapêr jarênh mex

ně nhũm htem amnhĩm mex ã harẽ. ¹⁹ Na pre jar Jejus kwỳjaja kot ma ixkôt Jerujarẽ hwỳr kàxpore hkwỳ ho mōr kaxyw nhũm prem amnhĩm mẽ kurê. Tã koja Xitre mẽ wa mẽ awỳr mōn pōj ka mẽ kãm kàxporeta gō nhũm man akupỳn o mō pa wa rĩ kormã ma Jerujarẽ hwỳr mẽ kãm o mō. Mẽ kot hamỳnh mẽ mẽ pamã mẽ hkĩnh ã kot amnhĩ tã mẽ pahpumunh kaxyw. Nẽ Tĩrtũm mã mex o mex ã harẽnh kaxyw. ²⁰⁻²¹ Nom kàxpore rax nhũm ixte mẽ hwỳr o inhmōr nhũm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtōta o mō. Ixte Xitre hkôt mẽ awỳr mēnh xwỳnhhta pa ma amnhĩ kôt o mō. Nom ixàhkĩnh o ixpare hã. Tĩrtũm kot ja kôt ixpumunh mex tã kot paj ma amnhĩ kôt o mō.

²² Nẽ ot pa ma Xitreta wa hkôt axte mẽ awỳr ja mẽ. Kêr kê mẽ axkruněpxi mẽ ma ixkukamã mẽ awỳr mō. Ixte wa hkôt mēnh xwỳnhhta ixte kot amnhĩ nhĩpêx ã omunh mex. Na hte kãm mẽ piitã mẽ ho ajuta ho pa hprãm mẽ. Tã mẽ ajarẽnh ma mẽ inhmã mẽ ajarẽnh o:

—Nà koja mẽ Jerujarẽ nhõ xwỳnhjê mã kàxpore nhõr rax mẽ kãm ga. Mẽ kot amnhĩ to mex kênã. Anẽ.

Jakamã ra mẽ awỳr hkrà. Tã koja ma Xitre wa hkôt mō mẽ mẽ ato ajuta ka mẽ tokyx kàxpore ho apikuprõnh pa.

²³ Nẽ koja mẽhõ tanhmã Xitre hã mẽ akukjêr to ka mẽ kêp ixkràmnhwỳ mex ã harẽ. Nẽ kot inhĩhkô hã mẽ ho ajuta mex o pa hã harẽ. Na pre ra jar Kris kwỳjaja mẽ akaxyw kuta mẽ ma mẽ awỳr kumẽ. Jakamã koja ma mẽ awỳr mō nhũm Kris kôt mẽ pahtōjê hõ wa pijakrutja wa ma hkôt mō. Na

hte wa haxwỳja Kris kôt amnhĩ nhĩpêx mex o pa.
²⁴ Koja mẽ awỳr pôj ka mẽ omu mẽ mẽ ho mex mẽ.
 Nẽ mẽ amã mẽ hkĩnh mẽ. Kê krĩ piitã hkôt Kris kôt
 mẽ pahkwỳjê piitã mẽ hã mẽ ajarênh ma mẽ axpẽn
 mã mẽ amex ã mẽ ajarê. Nẽ mẽ ajarênh o:

—Pêr ãm hãmri na pre Pawreja mẽ pamã Korît
 kãm mẽ pahkwỳjê jarê. Na xep pre Xitre mẽ
 hkwyta ma mẽ hwỳr mỗ nhũm mẽ ho mex rax mẽ.
 Ra Pawre kot mẽ pamã mẽ harênh xà hkôt. Anẽ.

9

Mẽ kot kàxpore ho pikuprõnh ã mẽ harênh

¹⁻² Kwa ixkràmnhwỳjaja. Kot paj Jerujarê nhõ
 xwỳnhjê kaxyw mẽ atã ixihýt x kêt mẽ. Ra mẽ amã
 mẽ ho ajuta hprãm jakamã na pa pre Masetõn
 kamã Kris kôt mẽ pahkwỳjê mã mẽ ajarênh o:

—Pika pê Gres kamã Kris kôt mẽ pahkwỳjaja na
 prem ham amgrà hapêxta kamã Jerujarê kamã mẽ
 pahkwỳjê jarênh ma mẽ kãm mẽ ho ajuta hprãm.
 Anẽ.

Hãmri nhũm mẽ ajarênh ma mẽ mẽ apyrà mẽ kãm
 tanhmã mẽ ho ajuta hto hprãm. ³⁻⁴ Tã ot pa mẽ
 awỳr Xitre mẽ hõta wa mẽ ho ixpimràatã wa mẽ
 kumẽ. Mẽ kot kàxpore hã mẽ akukjêr kaxyw. Kêr
 pa mytwrỳ hõ hã ma Masetõn nhõ xwỳnh kwỳjê
 mẽ mẽ awỳr mỗ mẽ ra ixte mẽ kãm kàxpore hkwy
 ho mẽ apikuprõnh ã mẽ ajarênh kôt mẽ ate ho
 apikuprõnh rax ã mẽ apumu mẽ ixkĩnh mẽ. Nom
 kot pa mỗ mẽ tee ri hapêr mẽ te ixte Masetõn
 nhõ xwỳnhjê mã mẽ ato ixêx pyrà mẽ ixpijaàm
 mẽ. Ka mẽ ajaxwỳja amnhĩ kamã apijaàm mẽ. ⁵ ã
 mẽ pahte amnhĩ nhĩpêx anhỹr pymaj na pa ã mẽ

amã kagàja nhîpêx nê Xitre mã ôr nê ma amnhî kukamã mẽ awýr mênh anê. Nê hkôt wa môr mã xwýnhṭa mẽ ho ixpimrààtãã amnhî kukamã wa mẽ kumê. Tã kê mẽ awýr pôj nê mẽ amã kagàja gô ka mẽ kamã harê nê ama nê tokyx kàxpore ho apikuprônḥ jatur xàm amê. Kêr pa mẽ hapu hã mẽ awýr mō ka mẽ ra mẽ ixkutêp ho apikuprônḥ pa nê mẽ kãm agô nê ajamakêtkati nê apa. No pa ixte mẽ amã mẽ ate ho apikuprônḥ kaxyw mẽ atã ixihṭýx kêt. ⁶ Na htem piitã ã hamaxpêr anhýr o pa nê hamaxpêr o:

—Kot ka apur rax nê kamã anhō rax nê. Nom kot ka apur grire nê kamã anhō grire.

Anhýr o hamaxpêr jakamã kêr ka mẽ apiitã ajamakêtkati nê Jerujarê nhō xwýnhjê mã kàxpore nhôr mex nê. Kêr ka mẽ ho apikuprônḥ pa nhũm rax nê. Te mēhō ihpur rax nê kamã ô raxta pyrāk. Kê Tîrtũm ã mẽ ate amnhî nhîpêx anhýr ã mẽ apumu nê nhýrmã mẽ ato mex nê. ⁷ Nom kêr ka mẽ anhōxý kamã mẽ kãm ôr kêt nê. Mẽ pahte pahkĩnh kãm panhōxý hkêt kãm mẽ kêp amrakati xwýnhjê mã mẽmoj nhôr o papaja na Tîrtũm kãm hprãm. ⁸⁻⁹ Kojã mẽ hã mẽ apumu hãmri nê amnhĩm mẽ amex ã mẽ ajarênh rãhã ho pa. Mẽ kãm Tîrtũm kĩnh xwýnhjaja na htem àmnhĩx ri mẽ kêp amrakati xwýnhjê mã mẽmoj nhôr o pa. Te Tîrtũm kot amnhî nhîpêx pyrāk. Na hte àmnhĩx ri mẽ pamã mẽmoj nhôr o pa. Mẽ pahwýr na rē nhũm wrý. Nhũm mẽ pamã mẽ paxàpkur xà nhôr o pa. Nê tanhmã mẽ pahto pu mẽ paxà hkêt nê pajamakêtkati nê paxàpênḥ o papa. Nê pamex nê ri papa. Panhō rũnh nê ri papa. Jakamã kwa pu mẽ urāk nê

paxàmnhĩx ri mẽ kêp amrakati xwỳnhjê mã mẽmoj nhõr o papa.

¹⁰ E pa ixprĩ hã mẽ amã ja jarẽ ka mẽ inhma. Nà na hte ã Tĩrtũm mẽ pamã mẽ paxàpkur xà nhõr o pa anẽ. Kot kaj apur kãm ahkre nhũm tanhmã amã mẽmo hyta nhĩpêx to nhũm amã hapôx mex nẽ amã ô rũnh nẽ ka anhõ rax nẽ. Nẽ hkwỳ ho axàpkur o apa nẽ axte hkwỳ hkre. Tã kêr ka mẽ ã Tĩrtũm kot mẽ ato mex anhỹr ã amnhĩ pumu hãmri nẽ uràk nẽ axàmnhĩx ri mẽ kêp amrakati xwỳnhjê mã axàmnhõr pẽ mẽ ho mex o ri apa. Nhũm Tĩrtũm mẽ hã mẽ apumu nẽ mẽ amã mẽmoj nhõr rãhã nẽ. Ka mẽ amnhĩ pyrà nẽ mẽ kêp amrakati xwỳnhjê mã hkwỳ nhõr o apa. ¹¹ Koja Tĩrtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kêp amrakati xwỳnhjê kaxyw kàxpore hkwỳjaxwỳ. Kêr pa mẽ amã hkwỳ jamỳ nẽ ma Tĩrtũm kôt mẽ pahkwỳjê mã o mỗ nẽ mẽ kãm kugõ kê mẽ omu nẽ hkĩnh nẽ. Nẽ mẽ atã Tĩrtũm mã mex o mex ã harẽ. ¹² Hãmri nẽ mẽ akukwak ri mex nẽ ri pa. Nẽ axpẽn mã Tĩrtũm mex o mex ã harẽn o ri pa. ¹³ Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽn to nẽ kãm:

—Pa Tĩrtũm. Nà ãm hãmri na pre Korĩt kãm akôt mẽ ixkwỳjaja amnhĩ jarẽ. Na htem akôt pix mã amnhĩ nhĩpêx mex o ri pa. Jao mẽ ixpê ôxy hkêt nẽ mẽ inhma kàxpore hkwỳ nhõr rax nẽ. àmnhĩx ri hamakêtkati nẽ mẽ inhma hkwỳ nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

14 Hāmri nē mẽ ato hwỳr o:

—Pa Tĩrtũm. Ām hāmri na hte Korĩť nhõ xwỳnhjaja amnhĩ pyrà nē mẽmoj to mẽ ixkutā no-jarēt o pa. Jakamā aa mẽ ixte amnhĩ tã mẽ inhno ho mẽ omunh kêt tã mẽ inhmā mẽ hkĩnh nē. Kwa kêr ka mẽ ixtā mẽmoj to mẽ kutā anojarēt rāhā ho apa Tĩrtũm.

Anhỹr o mẽ ato kuwỳ. 15 Tĩrtũmja mex o mex. Nom na hte mẽ pahto mex pē mẽ pamā kàxpore nhõr kêt nē. Kra Jejusja na pre mẽ pamā kugõ. Kām mẽ pajapê ho mẽ pahwỳr kumē nhũm mẽ pahwỳr wrỳ nē mẽ pahpiitā mẽ pahte amnhĩ tom-nuj pānhā amnhĩrer kaxyw mẽ panê ty. Ja na mex o kot mẽ pamā kàxpore nhõr jakrenh. Mēhõ koja uràk nē ā mẽ panê htyk anē? Nà amrakati ho amrakati. Ām Jejus pix na pre ā amnhĩ nhĩpêx anē.

10

Pawre kêp Tĩrtũm Karõ nhỹ hã kapêr xwỳnh ā harēnh

Epes 6.10-20; Wam Tesarõn 5.8

¹ E Kris kôt ixkwỳjaja. Nà ixpê Pawre kot paj mẽ akwỳ kot tanhmā ixto kapêr to xwỳnhjê mǎ amnhĩ jarē ka mẽ apiitā inhma. Nà na hte Kris mẽ pakamā gryk tokyx anhỹr kêt nē. Na hte mẽ pahto mex japjê nē. Tã inhmā uràk nē ā mẽ anhĩpêx anhỹr prām nē. No na hte mẽ akwỳjaja axpēn mǎ tanhmā ixto kapêr punuj to nē ri axpēn mǎ:

—Pawre na hte nhỹri krĩ kamā pa nē mẽ pamā kagà nhĩpêx nē mẽ pahwỳr kurē nē kamā mẽmoj tã mẽ pamā kapêr kām hihtỳx nē hã mẽ pamā akir. Tã amnē mẽ pahwỳr mō hāmri nē te kām mẽ pahpyma pyràk o mẽ pamā kapêr o pa.

Anhÿr o ijarê. ² Nom inhmã mẽ awÿr inhmôr nê mẽmoj tã mẽ amã ixàkjêr prãm kêt tã kot paj nhÿrmã mẽ awÿr mỗ ka mẽ tanhmã amnhĩ tomnuj to ho apa japêr. Pa ja hã mẽ apumu nê hã mẽ amã akir kãm ga. ³ Na pa htem jar pika ja kamã Tĩrtũm kwÿ hkêt xwÿnhjê kaêx ã ri ixpa nom mẽ uràk nê amnhĩ krã hkôt tanhmã amnhĩ nhĩpêx to ho ixpa hkêt nê. Nê mẽ uràk nê amnhĩ krã hkôt tanhmã ijamaxpêr to ho ixpa hkêt nê. Na pa htem Tĩrtũm Karô nhÿ hã àhpumunh xà ho amnhĩ nhĩpêx o ri ixpa. ⁴ Nê Tĩrtũm xàhpumunh tÿx xà ho mẽ kãm kapêr jarênh o ri ixpa. Mẽ kot mar nê hkôt amnhĩ nhĩpêx kaxyw. Nê àhpumunh tÿx o na pa htem mẽ kot Tĩrtũm kôt amnhĩ xunhwÿr pymaj mẽ kêp àmnâr xwÿnhjaja tanhmã mẽ nê mẽ ho. ⁵ Na htem htÿx ri tanhmã Tĩrtũm nê hkwÿjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nê Tĩrtũm xàhpumunh tÿx xà ho tanhmã mẽ kãm ixkapêr to nhũm mẽ tee ri inhma nê axte mẽ kêp àmnâr kêt nê. Pa mẽ kãm Tĩrtũm kapêr jarê nhũm mẽ ohtô nê kuma nê Kris kôt amnhĩ xunhwÿ nê hkôt amnhĩ nhĩpêx o pa. ⁶ Tã mẽ kajaja kot kaj mẽ Tĩrtũm kôt amnhĩ nhĩpêx mex tã mẽ atô ra kapêr nhĩrôp xa nê tanhmã amnhĩ tomnuj to. Pa ja hã apumu rÿ hã ajarênh ma nê hã amã akir. ⁷ Mẽ ate Tĩrtũm kot mẽ awÿr inhmênk kêt ã axpên mã ijarênh tã kot kaj mẽ atô ãm hãmri apê Kris kwÿ hã amnhĩ pumu nê ra mãânên pa ixpê hkwÿ hã ixpumunh kurê kumrêx. Mẽ apyrà nê ixpê hkwÿ kênã. ⁸ Na pa pre ma mẽ awÿr mỗ nê tanhmã mẽ amã amnhĩ jarênh to nê mẽ amã:

—Tîrtûm na pre mẽ awÿr inhmẽ pa mỗ. Ixte ÿ hã mẽ amã kapêr jarênh o ri mẽ akôt ixpa kaxyw. Anẽ.

Tã pa hte arĩ ã amnhĩ jarênh anhÿr o ri ixpa. ãm hãmri na pre Tîrtûm mẽ awÿr inhmẽ pa hte ãm hãmri mẽ amã kapêr jarênh o ri mẽ akôt ixpa. Na pa hte Tîrtûm nhÿ hã mẽ amã ixkapêr nẽ kapêr o ixêx o amnhĩ to jarkrar kêt nẽ. Ixte tanhmã mẽ atomnuj to ho ri ixpa kaxyw na pre Tîrtûm mẽ awÿr inhmênh kêt. Mẽ amã ixkapêr mex nhũm mẽ ate inhmar nẽ Kris kapêr kôt amnhĩ nhĩpêx mex o apa kaxyw na pre mẽ awÿr inhmẽ. ⁹ E kwa Kris kôt ixkwÿjaja. Na pa hte mẽ amã xpuma kaxyw mẽ awÿr kagà rênh kêt nẽ. Mẽ ate kamã harênh nẽ tee ri amnhĩ kukamã ajamaxpêr o amnhĩ kamã amã ma kaxyw kêt. ¹⁰ Mẽ akamã mẽ kãm ixkĩnh kêt xwÿnhjaja na htem ijarênh o:

—Pawre na hte awry hã pa nẽ mẽ pahwÿr kagà rênh nẽ kamã te kêp pahi ho amnhĩ nhĩpêx pyrà nẽ mẽmoj tã mẽ pamã kapêr kãm hihtÿx nẽ. Tã mẽ pahwÿr pøj hãmri nẽ kapêr kaxyw nom kapêr kãm hihtÿx o kapêr kêt nẽ. Jakamã mo kaxyw kot puj mẽ hwÿr mra nẽ kapêr ma?

Anhÿr o ijarẽ. ¹¹ Nom ã ixte anhÿr kêt. Kwa mẽ inhma. Kot paj nhÿrmã ma mẽ awÿr mỗ hãmri nẽ te kagà ja kamã mẽ amã ixkapêr pyràk o mẽ amã ixkapêr nẽ ixkapêr xihtÿx o mẽ amã ixkapêr kãm ga.

¹² Na hte mẽ akwÿjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarênh anẽ. Na hte Tîrtûm ã mẽ harênh anhÿr kêt nẽ. ¹³ Tã inhmã mẽ uràk nẽ ã amnhĩ jarênh anhÿr prãm kêt. ãm

ixte Tīrtūm kot tanhmā inhmā karō hto xà hkôt amnhĩ nhĩpêx o ixpaja na inhmā hprām. Tã mẽ kajaja mẽ awỳr na pre inhmẽ. ¹⁴ Ra kot mẽ awỳr inhmēnh jakamã ixkumrẽx na pa pre mẽ awỳr mō nẽ mẽ akôt ri mẽ amã tanhmā Kris jarēnh to ho ri xpa. Tīrtūm kām nhỹhỹm xpa hprām xà pix wỳr na inhmā xpa hprām.

¹⁵ No kêt mẽ kot amnhĩ krã hkôt htỳx ri Tīrtūm kapēr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harēnh ma nẽ mẽ hã amnhĩ to jarkrar o ri pa. Te tām kot mẽ hwỳr mōr nẽ mẽ kām ujarēnh nhũm mẽ kot mẽ mar xà hkôt Kris kôt amnhĩ xunhwỳr pyrāk. Nẽ mẽ hã amnhĩ to jarkrar o:

—E na pa pre ma mẽ hwỳr mō nẽ mẽ kām Tīrtūm kapēr jarē nhũm mẽ inhma nẽ hkôt amnhĩ xunhwỳr kurê kumrẽx. Ixkukwak ri na prem ã amnhĩ nhĩpêx anẽ. Anẽ.

Nom ã amnhĩ nhĩpêx anhyrja ã amnhĩ to hêx. No pa na pa hte ho mẽ urāk kêt nẽ. Kojã Tīrtūm ma nhỹri krĩ hwỳr ixkwỳjê hō mẽ nhũm ma hwỳr mō nẽ mẽ kām Kris kapēr jarē. Hāmri nhũm mẽ kuma nẽ Kris kôt amnhĩ xunhwỳ. Pa mẽ harēnh ma nẽ mẽ ỹ hã ixkĩnh nẽ nom pa ixkukwak ri mẽ kot hkôt amnhĩ xunhwỳr ã amnhĩ to jarkrar kêt nẽ. Ixte mẽ hwỳr xpa nẽ mẽ kām ixujarēnhre hã kot pa hkêt mẽ hã amnhĩ to jarkrar. Âm Tīrtūm kām nhỹhỹm xpa hprām xà pix wỳr na pa hte xpa nẽ mẽ kām kapēr jarē. Jakamã kot kaj mẽ nhỹrmã Kris kôt amnhĩ nhĩpêx mex o ri apa pa ja hã mẽ apumu nẽ mẽ are nẽ hpānhã ma krĩ hō hwỳr Kris kot mẽ hwỳr inhmēnh xà hō hwỳr mō. Ka mẽ ja hã ixto Tīrtūm wỳr o apa. ¹⁶ Kot paj mẽ anhō krĩ kamã

mê piitã mê kãm Jejus kapêr jarênh pa hãmri nê hpãnhã ma krĩ hkwý hkôt ijapôx o ri ixpa nê kamã mê kãm harênh o ri mê hkôt ixpa. Kormã aa mê kot mar kêt kumrêx xwýnhjê mã harênh o ri mê hkôt ixpa. Na pa hte ã mê hwýr ixpa nê mê kãm ixujarênh anê. Jakamã nhũm mê ja hã ixpumu nê mê kot Tĩrtũm kapêr mar xwýnhjê pix wýr ixpa hã ijarênh kêt nê.

¹⁷ Nê Tĩrtũm kapêr ã kagà htũm kot mẽmoj tã mẽ kot amnhĩ to jarkrar ã harênh kot:

Kêr ka mẽ kamjaja amnhĩ mex ã amnhĩ to jarkrar kêt nê. ãm Tĩrtũm pix mã mãn mex o mex ã harênh o ri ho jarkrar o ri apa. Anê.

¹⁸ Kot pu mẽ Tĩrtũm noo mã amnhĩ to mex ã amnhĩ to jarkrar nê ãm amnhĩ to jarkrar kaprý. Nom koja Tĩrtũm tãm ja hã mẽ pahto jarkrar nê ãm hãmri mẽ pahte amnhĩ to mex xwýnh ã pahto jarkrar.

11

Jejus kot mẽ hwýr mẽ rênh ã amnhĩ to hêx xwýnhjê jarênh

Matêwre 7.15; Rômãn 16.17; Karatas 1.6-9; Korosê 2.8; Sikûn Pêtre 2.1

¹ E kot paj te mẽ hkrã pipãnh xwýnh kot htýx ri amnhĩ jarênh pyrãk o tanhmã mẽ amã amnhĩ to jarkrar to. Kwa mẽ inhma nê ixkamã agryk kêt nê. No mẽ ixkapêr kumrêx mãn ma. ² Inhma mẽ akĩnh. Te ho Mêpahpãm Tĩrtũm kãm mẽ akĩnhhta pyrãk. Te mẽ apê mēhō kukrit kãm my hkĩnh nê kot ho mjên prãm xwýnhhta pyrãk. Kãm mẽmyjê piitã mẽ hkĩnh kêt ãm kãm pix kĩnh. Ja pyrã nê kêr ka mẽ amã Kris kĩnh o nhãm amã mẽ hkĩnh xwýnhjê jakre. Te

ho mēhō ni kot kām myta pix kīnh nē kām ho mjên prām xwýnh̄ta pyrāk. Ja na pa inh̄mā hprām. ³ Ra mē amā Kris kīnh tỳx o apa nē hkôt amnh̄i nh̄ipêx mex o ri apa htā nh̄um mē kot amnh̄i krā hkôt htỳx ri Tĩrtũm kapêr jahkre ho mē pa xwýnh̄jaja tee ri ja hā mē ajarēnh ma nē axpēn mā mē ajarēnh o:

—Kwa nà ja mex kêt. Kojā mē Pawre kapêr ma nē âm kuma nh̄um ja mex nē. No mē pahkôt mē kot amnh̄i nh̄ipêxja na mē pamā mex. Ja na kêt mē pamā mex o mex. Anē.

Hāmri nē ra kot Kris nē tanhmā mē amā hêx to kaxyw. Te amnepê mā kagā kot mē panā kot wa pē Ewa mā hêx nh̄um kot mar nē hkôt amnh̄i nh̄ipêxta pyrāk. ⁴ Na pa pre ra mē awýr mō nē mē amā tanhmā Jejus jarēnh to. Nē tanhmā mē amā Tĩrtũm Karō jarēnh to. Nē tanhmā wa kot mē pahto hkra hto hā mē amā wa harē ka prem inh̄ma nē mar tỳx nē. Tā nh̄um ra mē kot htỳx ri Tĩrtũm kapêr jahkre xwýnh̄jaja ixpānhā mē awýr mō nē Jejus kapêr kwým ri tanhmā mē amā ujarēnh to nē mē amā harēnh o hêx rāhā ho pa. Nē Tĩrtũm Karōja nh̄um mē amā tanhmā ho hêx to. Nē ixte mē amā Tĩrtũm kapêr jarēnh kwým ri ixpānhā tanhmā mē amā harēnh to ho pa. Na ka prem mē ama nē âm hāmri harēnh ā hkamnh̄ix. Kwa kêr ka mē ri mē ujarēnh piitā mar nē hkôt amnh̄i nh̄ipêx kêt nē. Mē kot Jejus jarēnh tā no âm katāt kôt harēnh kêt nē. Âm ri ho hêx o pa. Ka htem ama nē âm hāmri harēnh ā hkamnh̄ix nē mē amā mē mar prām nē. Mē kot mē amā harēnh o hêx o pa htā ka mē ama nē ra mē hkôt amnh̄i nh̄ipêx kaxyw. Kwa mē ri ā amnh̄i nh̄ipêx anh̄yr hkêt nē. ⁵ Kris kot mē awýr mē rēnh ā mē kot amnh̄i jarēnh tā amnh̄i to hêx.

Ka prem ama nê ãm hãmri mẽ kot mẽ amã harênh ã mẽ hkamnhĩx. Nom na pre Krisja mẽ awỳr mẽ rênh kêt nê. Kêt pa na pre mẽ awỳr inhmẽ. ⁶ Mẽ hkĩnhã ixkapêr krór pyràk tã no ãm ixte Tĩrtũm kapêr mar tỳx. Nê kot amnhĩ nhĩpêxja na ixte omunh par. Ra mẽ ate ja hã ixpumunh mex.

⁷ Na pa pre mẽ akôt ri mẽ amã Jejus jarênh o ri ixpa no ãm hpãnhã mẽmoj tã mẽ awỳr o ri ixpa hkêt nê. Xà amarĩ ixte mẽ amã harênh nê hpãnhã mẽmoj tã mẽ awỳr kêtja mẽ apê omnuj? ⁸⁻⁹ Kormã ixte mẽ amã Tĩrtũm kapêr jarênh o ri ixpata ã na pa pre hte tũhã kàxpore ho presija no ãm aa hã mẽ awỳr kêt nê. Jar Masetũn kamã Kris kôt mẽ pahkwỳjaja na prem ixwỳr hkwỳ rênh o pa pa ho ixàpkur xã japrôr o ri mẽ akôt ixpa. Mẽ kumã ixte Tĩrtũm kapêr jarênh o ri ixpa hkêt tã pa hte mẽ kukwak ri mẽ akôt ho ixàpkur o ri ixpa. Tã kot paj arĩ ã mẽ akôt ixpa nê ã amnhĩ nhĩpêx anê nê mẽmoj tã mẽ awỳr o ri ixpa hkêt nê. ¹⁰ Ja inhmã mex. Jakamã kot paj amarĩ mẽ anhũ pika pê Gres kãm ã mẽ amã Tĩrtũm kapêr jarênh o ixpa anê nê mẽmoj tã mẽ awỳr kêt nê. ãm hãmri na pa ã mẽ amã amnhĩ jarênh anê. Kris pyrã nê ixêx kêt kênã. ¹¹ Xà we inhmã mẽ akĩnh kêt kôt na pa hte ã mẽ amã Tĩrtũm kapêr jarênh pãnhã mẽ awỳr kêt anê? Nà inhmã mẽ akĩnh jakamã na pa hte kapêr jarênh pãnhã mẽ awỳr o ri ixpa hkêt nê. Inhmã mẽ akĩnh tỳx kênã. Tĩrtũm kot ja hã ixpumunh mex. ¹² No mẽ kot amnhĩ krã hkôt htỳx ri Tĩrtũm kapêr jahkre xwỳnhjaja na htem mẽ ajahkre hpãnhã kàxpore hã mẽ awỳr pix o pa. Nê mẽ amã tanhmã amnhĩ to hêx to nê mẽ amã:

—Nà mẽ ixte Pawre kot amnhĩ nhĩpêx pyràk. Mẽ ixte amnhĩ nhĩpêxa kot axpên pyràk.

Anhỹr o mẽ amã amnhĩ to hêx. Nom ixte ho mẽ uràk kêt kumrêx. Mẽ ixte amnhĩ nhĩpêx kot axpên pyràk ronhỹx pa mẽ uràk nê kàxpore hã mẽ awỳr o ri ixpa. Nom ixte ã amnhĩ nhĩpêx anhỹr kêt. Kot paj aa ã amnhĩ nhĩpêx anhỹr o ixpa hkêt nê.

¹³ ã mẽ kot amnhĩ nhĩpêx anhỹr xwỳnhjaja na pre Tĩrtũm mẽ awỳr mẽ rênh kêt nê. Mẽ kot Kris nhỹ hã mẽ ahkre xwỳnh ã amnhĩ jarênh tã ãm amnhĩ to hêx. ¹⁴ Mẽ õ pahi Satanastija te mẽmoj mex jarênh pyràk tã no ãm na hte mẽ pano kupyr pê mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harênh pyràk tã no ãm ho hêx.

¹⁵ Tã hkôt mẽ kot amnhĩ nhĩpêx xwỳnhjaja na htem uràk nê te tãm mẽ kot amnhĩ nhĩpêx xwỳnhjê pyrà nê mẽ pahwỳr mra nê tanhmã mẽ pamã hêx to. Satanasti pyrà nê mẽ pano kupyr kaxyw tanhmã mẽ pamã hêx to. Nom koja Tĩrtũm nhỹrmã mẽ pahtã mẽ homnuj tỳx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harênh

Atre 9.23-25

¹⁶ E kot paj axte te ixtỳx ri amnhĩ to jarkrar pyràk o mẽ amã tanhmã amnhĩ jarênh to ka mẽ inhma nê ixkamã agryk kêt nê. ¹⁷ Pahihti Kris nhỹ hã kot paj mẽ amã amnhĩ jarênh kêt ãm amnhĩ krã hkôt kot paj mẽ amã amnhĩ jarê. ¹⁸ Na htem ohtô nê mẽ ate mẽ hã apijaàm kaxyw tanhmã mẽ amã amnhĩ to jarkrar to ho pa. Tã kot paj mẽ uràk nê amnhĩ krã hkôt mẽ amã amnhĩ to jarkrar ka mẽ

inhma. ¹⁹ Mẽ ate amnhĩ xàhpumunh tỳx ã amnhĩ jarẽnh tã ka htem htỳx ri mẽ kot amnhĩ to jarkrar o ri mẽ pa xwỳnhjê kapêr ma nẽ mẽ hkôt ajamaxpêr nẽ mẽ hkôt amnhĩ nhĩpêx kurê kumrêx. ²⁰ Mẽ kot Kris nhỹ hã mẽ ahkre hã amnhĩ to hêx xwỳnhjaja mẽ pakuirom mẽ kot amnhĩ to rax xwỳnh ã amnhĩ jarẽnh jakamã na htem mẽmoj tã mẽ amã karõ ho pa.

Nẽ mẽ kãm hprãm xà hkôt nhỹhỹm mẽ arẽ nẽ nhỹhỹm mẽ arẽ.

Nẽ mẽ apa pix kukwak ri apkur o pa.

Nẽ mẽmoj tã mẽ ajakwap mẽ atak o pa.

Ã mẽ kot mẽ anhĩpêx anhỹr tã ka te mẽ ate atũm kêt pyrã nẽ atỳx ri mẽ kapêr ma nẽ mẽ hkôt amnhĩ nhĩpêx o ri apa. ²¹ Tã ixte mẽ uràk nẽ ã mẽ anhĩpêx anhỹr kêt tã kot paj mẽ uràk nẽ mẽ amã tanhmã amnhĩ to jarkrar to ka mẽ inhmar japêr. Te ixtỳx ri amnhĩ jarẽnh pyrãk o kot paj mẽ amã amnhĩ jarẽ nom ãm hãmri mẽ amã amnhĩ jarẽ. ²² Mẽ kot Jesus nhỹ hã mẽ ahkre hã amnhĩ to mẽ hêx xwỳnhjaja na htem mẽ amã tanhmã amnhĩ to jarkrar to nẽ mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htàmnhwỳ jakamã kwa mẽ ixkapêr ma nẽ mẽ ixkôt amnhĩ nhĩpêx. Anẽ.

Nom ijaxwỳja ixpê Ijaew tã pa hte mẽ uràk nẽ ja hã amnhĩ to jarkrar hkêt nẽ. ²³ Nẽ mẽ kot Kris kapêr jarẽnh mex o pa hã amnhĩ jarẽnh tã pa na pa hte harẽnh mex o mẽ hakre. Te ixkrã pipãnh pyrãk o ã mẽ amã amnhĩ jarẽnh anhỹr tãã.

E pa mẽ amã tanhmã amnhĩ jarẽnh to ka mẽ inhma. Nà na pre Kris ã mẽ kãm ixkurê xwỳnhjaja

mê kot amnhĩ to jarkrar xwýnhjê hkĩnhã Kris ã ixpynênh nê ijagjênh xohtô nê. Nê mê hkĩnhã tôhã ixtak rûnh kumrêx. Pa mê hkĩnhã xatã mê kot tanhmã ixto hã kritpêm ronhỹx pa pre ty. ²⁴ Na pre Ijaew krãhtũmjaja Kris ã ixkatut kãm ixtak rûnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rûnh o ixkatut kà rê. Ixtak o 39 hãmri nê rĩ kormã mê kot ixpĩr pymaj inhmã ure. Na pre htem nhỹri ixpynê nê ã inhĩpêx anê. Na prem ã inhĩpêx anhỹr o 5 wês.

²⁵ Nê na prem ra mê kot ixpĩr kaxyw nê kên rûnh kwý jamý nê ho ixtak o kuhê. Nê Rôm nhõ xwýnhjaja haxwýja pĩ ho ixtak rax kumrêx. ã inhĩpêx anhỹr o axkrunêpxi.

Nê na pa pre hte gô xujanãr kãm nhỹhỹm Jejus jarênh o ri ixpa kaxyw pàr kãm mê hwýr ixpa nhũm pàrja tanhmã amnhĩ to nê agjê. Kritpêm nhỹx pre hte gôja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pàr ô mã axà nê ma axte krĩ hõ hwýr mō. Nhũm kê pàrta axte mê ixpê axà nhũm gôja nhỹx kê axte ixpĩ. Pa pàr jakà hã kumý nê hã ijêť o amỹkry. Nê ho apkati. Tã nhũm nhỹhỹnh pàr ôja mō nhũm kamã mê mōr xwýnhjaja ixpumu nê ixwýr pàr o mō nê amnhĩ wýr ixto api nê ma amnhĩ kôt ixto mō.

²⁶ Na pa pre amnhĩ xà htýx kamã ijamak o ri ã mê kãm Kris kapêr jarênh o ri ixpa anê. Kironhỹx pre gô tàmja ixpĩ. Nhũm mê àhkĩnh nhi xwýnhjaja kironhỹx prem mãânên ixpĩ. Nê Ijaew nê Ijaew kêt xwýnhjaja tôhã tanhmã ixtomnuj to ho pa. Pa pre krĩ hkwy hwýr ixpa rý kapôt ã ixpa nhũm mê ixtã amýnê. Pa pre gô xujanãr kãm pàr kãm ri ixpa nê

nhỹx kamã ty. Nhũm mẽ kêp Kris kwỳ hã amnhĩ to hêx xwỳnhjaja haxwỳja tanhmã ixtomnuj to pa mẽ ỹ hã amnhĩ xà htỳx kamã ijamak o ri ixa. ã na prem Kris ã inhĩpêx anhỹr o pa.

²⁷ Nê na pa Jejus kapêr jarênh o ri ixa kurê ixkêngrà nê ri ixa. Nê tōhã inhôt kêt ã ixtã apkati. Nê tōhã inhmã prãm nê inhmã kôr nê ri ixa. Nê tōhã ixê mex kêt nê inhmã kry nê ri ixa. ²⁸ Na pa hte Kris kapêr jarênh o ri ixa pê ã amnhĩ nhĩpêx anê. Nom ja pix kêt. Na pa hte krĩ piitã hkôt Kris kwỳjê hkukamã tee ri ijamaxpêr nê ijamaxpêr o:

—Hêxta waa nê. Mãn mẽ arĩ Kris kôt amnhĩ nhĩpêx mex japêr rỳ ko. Mãn mẽ ra kapêr kwỳm ri tanhmã amnhĩ tomnuj to rỳ ra hkaga.

Anhỹr o ijamaxpêr o ixa.

²⁹ Nê na hte mēhō Tĩrtũm kapêr nhĩrôp xa nê tanhmã amnhĩ tomnuj to pa tee ri omu nê ixkaprĩ htỳx kumrêx. Kojã mēhō tanhmã Tĩrtũm nê mēhō mã kapêr to nhũm kuma nê Tĩrtũm kôt amnhĩ nhĩpêx kêt pa tee ri ja hã omu nê nê kêp àmnàr xwỳnhhta kamã inhgryk tỳx kumrêx.

³⁰ E Kris kôt ixkwỳjaja. Na pa ã mẽ amã amnhĩ jarênh anê. Te ixte amnhĩ to ijarkrar pyràk no ãm mẽ ate ixirerek xwỳnh ã ixpumunh pix kaxyw.

³¹ ãm hãmri na pa ã mẽ amã amnhĩ jarênh anê. Ixêx kêt. Pahihti Jejus nhĩpêxà Tĩrtũm kot ja hã ixpumunh mex. Tĩrtũmja mex o mex. Kojã mex o mex tũm nê pa rãhã ho pa. Tãm kot ixirerek ã ixpumunh mex. ³² Kormã krĩ pê Tamas kãm ixpare ri na pre mẽ ò pahi Arêtja mẽ kãm ixtã amỹnê nhũm pōristijaja krĩ hpu hã kahê xà nhō hakwakre piitã kãm hipôk pa nê ixkãm hamak o

kuhê. Pa tee inhmã nhÿhÿnh ixkator nê ma mẽ umaj ixprôt nê ixtêm prãm nê ixirerek xwÿnh ã amnhĩ pumunh kurê kumrêx. ³³ Tã nhũm Kris kôt mẽ pahkwÿjaja hamaxpêr nê kawà rax mÿ nê o tẽ nê inhmã ãm pa hwÿr axà nê kamã nhÿ. Hãmri nhũm mẽ pàr nhõr o kahê nhĩrô pê ixto wrÿ pa ixkato nê mẽ kêp amũxu nê amnhĩm ixprĩ nê ma tẽ nê mẽ kêp akunok. ã na pre Tĩrtũm ixirerek xwÿnh ã inhmã ixto amnhĩrĩt anê.

12

Tĩrtũm kot Pawre mã mẽmoj to amnhĩrĩt ã harênh

¹ E Kris kôt ixkwÿjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarênh to ka mẽ inhma nê hã ixtã apijaam japêr. Na hte Tĩrtũm tõiã inhôt kãm ixkarô mã tanhmã kapêr to. ²⁻³ Amnepê mã amgrà hõ hã na pre tanhmã ixkrã hto nê õ krĩ hwÿr amnhĩ wÿr ixto api. Na pre ra hã amgrà pê 14 ãn. Apu inhĩ rãhã ixto api rÿ apu ãm ixkarô pix o api rÿ ko. Ixte ja hã amnhĩ pumunh mex kêt. Tĩrtũm pix kot ja hã ixpumunh. ⁴ Na pre ixto api pa pôi nê õ krĩ kamã axtem tanhmã mẽ kapêr to hã mẽ kuma. Na prem mẽmoj mex kumrêx jarê pa kuma nê ixkĩnh nê. Nê inhmã mar prãm nê. Hãmri nê ijamaxpêr o:

—Hêxta waa nê. Mẽmoj jarênhja mex kumrêx. Nà kot paj akupÿm wrÿ nê ixkwÿjê mã harê kê mẽ ixpyrà nê kuma. Nà kot paj anê.

Anhÿr tã nhũm Tĩrtũm Karô ja nê ixkurê nê inhmã:

—Nà kêr ka mẽ kãm ja jarênh kêt nê. ãm kapx-
ipix kot kaj ama nê ri hã apa.

⁵ Anhÿr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar kêt nẽ. Kot paj ãm Jejus pix tanhmã harẽnh to ho ri ixpa. Jao ixrom mex o mex ã harẽ. Nẽ ixrom hihtÿx o hihtÿx nẽ àhpumunh o àhpumunh ã harẽnh o ri ixpa.

⁶ Nẽ ixte Tĩrtũm nhõ krĩ hwÿr ixàpirja ãm hãmri ixte hã amnhĩ jarẽnh tã kot paj ja hã amnhĩ to jarkrar o ri ixpa hkêt nẽ. Mẽ ate ja hã inhmar kôt inhmex ã ijarẽnhja na inhmã hprãm kêt. Nom kot ka mẽ ixte tãm amnhĩ nhĩpêx ã xpumu nẽ tãm ixkapêr ã inhma hãmri nẽ rĩ kormã inhmã inhmex ã ijarẽ. ã mẽ ate amnhĩ nhĩpêx anhÿrja na inhmã hprãm. ⁷ Na pre Tĩrtũm inhôt kãm inhmã mẽmoj mex kwÿ jarẽnh rax nẽ. Hãmri nẽ hpãnhã inhmã:

—E na ka akwÿjê rom inhõ krĩ hwÿr api nẽ mẽ kurom mẽmoj mex pumunh rax nẽ. Tã ate ja hã amnhĩ pumunh nẽ ma mẽ kãm hã amnhĩ to jarkrar o ri apa pymaj kot paj Satanasti mã anẽ nhũm inhma nẽ tanhmã atomnuj to ho pa. Nom ijamaxpêr xà hkôt koja ã anhĩpêx anẽ.

Anhÿr jakamã nhũm tanhmã inhĩpêx to pa inhmex kêt nẽ ixpa. Te mrônhĩ rax nhÿhÿnh kot ixkamnhwÿr nhũm inhmã tee ri hkaxàr prãm kaprÿ nẽ ÿ hã ho inhgiêx rãhã nẽ ixpaja pyræk. ⁸ Tã pa tee ri ja hã amnhĩ pumu nẽ amnhĩ to Jejus wÿ nẽ kãm:

—Kwa Pahiiti. Na pa ra mẽmojta nhÿ hã ixpunuj nẽ ixirerek nẽ ixpa. Kwa inhnê ata pa akupÿm ixihtÿx nẽ ijamakêtkati nẽ ri ixpa nà?

Anhÿr o amnhĩ to hwÿr o axkrunêpxi. ⁹ Hãmri nhũm inhmã:

—Nà kot paj anê hyr kêt nê. Kot paj âm akutã inhnojarêt rãhã ho ri akôt ixpa. Ka axirerek nê apa htã ixih̄t̄ȳx xw̄ȳnh ã ixpumunh kôt ixkamnàr rom tanhmã inh̄ȳ hã amnhĩ nhĩpêx to ho ri apa. Anê.

Ã inhmã kapêr anh̄ȳr jakamã na pa ixpunuj nê ri inh̄irot nê ixpa htã ixrom hiht̄ȳx xw̄ȳnh̄ta nh̄ȳ hã ixkĩnh nê ixpa. Nê kurom ixirerek xw̄ȳnh pix ã amnhĩ to jarkrar o ri ixpa. ¹⁰ Jakamã kot paj Kris ã ixpunuj nê ri ixpa htã ixkĩnh nê ijamakêtkati nê ri ixpa. Kwãr mẽ mãm̄rĩ hã tanhmã ixto kapêr to nê tanhmã hã inh̄irot to pa amnhĩ xà ht̄ȳx kamã ijamak o ri ixpa. Nê ixpê amrakati nê inh̄irot nê ri ixpa htã Kris nh̄ȳ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harênh

¹¹ Tã mẽmo kaxyw na pa ã mẽ amã amnhĩ jarênh anê? Nà mẽ ate ixtã apijaàm kêt jakamã na pa ã mẽ amã amnhĩ jarênh anê. Mẽ kêp Kris nh̄ȳ hã mẽ ajahkre xw̄ȳnh ã amnhĩ to hêx xw̄ȳnh̄jaja na ka htem ixrom kot amnhĩ to rũnh xw̄ȳnh ã mẽ harê nê mẽ hã apijaàm o ri apa. Nom ixte amnhĩ to grire xw̄ȳnh tã mẽ kot amnhĩ to rũnh o ijakrenh kêt. ¹² Na pa pre mẽ akamã ri ixpa nê Tĩrtũm nh̄ȳ hã aa mẽ ate mẽmoj pumunh kêt kw̄ȳ ho anh̄ȳr rax o ri mẽ akôt ixpa. Nê ỹ hã akup̄ȳm mẽ à xw̄ȳnh̄jê ho mex. Nê mẽ nohkre xw̄ȳnh̄jê no ho mex. Na pa pre hte ã mẽ amã mẽmoj nhĩpêx anh̄ȳr o ri mẽ akôt ixpa. Amnhĩ xà ht̄ȳx kamã ijamak o ri ixpa htã Tĩrtũm xiht̄ȳx xà ho amnhĩ to ht̄ȳx nê ã mẽ amã mẽmoj to anh̄ȳr o ri mẽ akôt ixpa. Mẽ ate omunh nê Tĩrtũm àhpumunh t̄ȳx ã omunh kurê kumrêx kaxyw. Nê ixpê Kris nh̄ȳ hã mẽ ajahkre

hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa. ¹³ Xàn pa pre nhãm krĩ hkwỳ kamã Kris kôt mẽ pahkwỳjê ho mex tâ mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpên pyràk. ãm mẽmoj pixire na pa pre mẽ uràk nê mẽ awỳr kêt nê. Nhãm krĩ hkwỳ kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mỗ nê mẽ akôt ixpa nê mẽmoj to presija htã hã mẽ awỳr kêt nê. Kwa mẽ ã ixte amnhĩ jarênh anhỹrja ma nê ixkamã agryk kêt nê.

¹⁴ Tã ot pa ra akupỹm mẽ awỳr inhnojarêk kaxyw. Na pa pre ra mẽ awỳr inhmõr o axkrut. Tã ra axte mẽ awỳr inhnojarêk kaxyw. Kot paj mẽ awỳr mỗ nê mẽ akôt ixpa nom te wam ixtêmta pyrà nê mẽmoj tã ri mẽ awỳr kêt nê. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyràk. Na hte mẽ hkrarejaja mẽ katorxà nê mẽ hipêêxà mã uja prôr o pa hkêt nê. Mẽ hipêêxà nê mẽ katorxà na hte hkrare mã kot mẽmoj to presija xà hkôt kãm haprôr o pa nom mẽmoj tã hwỳr kêt nê. Ja pyrà nê kot paj mẽ apê ixkra pyràk ã mẽmoj tã mẽ awỳr kêt nê. ¹⁵ Kot kaj mẽ mẽmoj to presija japêr nê inhmã harê pa ixãmnhĩx ixkĩnh kãm mẽ amã ixkàxpore piitã òr par pyràk o amnhĩ nhĩpêx. Nê mẽ amã tanhmã amnhĩ nhĩpêx to ho ixpa rãhã ixykja na inhmã hprãm. Inhmã mẽ akĩnh tỳx kumrêx tâ mẽ kajaja mẽ amã ixkĩnhja mẽ atã hkwỳ jêt kêt kumrêx. ¹⁶ Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kêp amrakati xwỳnhjê mã kàxpore hã mẽ awỳr o ixpa hã ixkamnhĩx.

¹⁷ Kwa tanhmã na pa pre ri mẽ ano kupyr to? Xà ja kaxyw na pa pre mẽ awỳr ixkràmnhwỳta wa kumẽ? ¹⁸ Na pa pre Xitre hã ixihỳx nẽ mẽ awỳr kumẽ. Nẽ Kris kôt mẽ pahtōja pa Xitre hkôt kumẽ nhũm wa ma mẽ awỳr mō. Tã xà na pa pre Xitre tanhmã mẽ ano kupyr to? Nà na pre ã mẽ anhĩpêx anhỳr kêt nẽ. Tã wa ixte amnhĩ nhĩpêx nẽ wa ijamaxpêrja kot axpên pyràk. Nà na pa hte uràk nẽ mẽ ano kupyr o ri ixpa hkêt nẽ. ¹⁹ Mãn ka mẽ axpên mã mẽ ijarênh o:

—Nà Pawre mẽ hkwỳjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprār anẽ.

Anhỳr o mẽ ijarênh japêr nom mẽ inhmã amnhĩ tã tanhmã ixàprār to hprãm kêt. ãm mẽ inhmã mẽ akĩnh nẽ mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarênh anẽ.

²⁰ Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỳr o apa.

Rỳ axpên pê anhōxỳ.

Rỳ axpên to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỳr o ri apa pa ja hã mẽ apumu nẽ ixkaprĩ htỳx kumrêx ka mẽ tee ri amnhĩ tã ixpumu. ²¹ Xà kot paj mẽ awỳr mō

nê mẽ apumu ka mẽ akwỳjaja arĩ mẽ aprõ kuhpa hã nhãm mênijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anê pa ja hã mẽ apumu nê ixkaprĩ xàj inhmỳr rax nê. Nê mẽ anhy hã Tĩrtũm noo mã ixpijaàm tỳx kumrêx.

13

Pawre kot tanhmã amnhĩ kukamã mẽ kãm karõ hto

¹ Tĩrtũm kapêr ã kagà htũm tanhmã mẽ kot amnhĩ tomnuj to xwỳnhjê jarênh kot:

Koja mēhō tanhmã amnhĩ tomnuj to nhũm mēhō pyxi nê ã amnhĩ nhĩpêx anhyr ã omu nê awyr tē nê amã harē ka mẽ ama nê ãm ama nê hkôt ajamaxpêr kêt nê. No koja mēmojaja axkrut rỳ axkrunēpxi nê hã omu nê awyr mra nê axpēn kôt amã harē ka mẽ ama nê mẽ hkôt ajamaxpêr kurē kumrêx. Anê.

Tã ra mẽ awyr inhmōr o axkrut tã kot paj akupỹm mẽ awyr mō nê mẽ apumu. ² Hapu hã mẽ awyr inhmōrta ã na pa pre mẽ akwỳ kot tanhmã amnhĩ tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhĩ tomnuj kaga nê tãm amnhĩ nhĩpêx kêt kot paj nhỹrmã akupỹn mẽ awyr mō nê ã mẽ ate amnhĩ nhĩpêx anhyr ã mẽ apumu nê hã mẽ atomnuj tỳx kumrêx kãm ga. Anê.

Jakamã kot paj mẽ ma mẽ awyr mō nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarē pa mẽ atã mẽ kuma nê tanhmã mẽ ato htỳx nê. ³ Kot kaj mẽ ja hã ixpumu nê aprĩ hã

ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹrja kaga hkêr hã koja tee ri ja hã mẽ apumu nẽ mẽ anhĩpêx kati nẽ. ⁴ Amnepêm na pre Krisja te hihtỳx kêt pyrà nẽ ãm arĩ mẽ kãm xa nhũm mẽ unê nẽ pĩ kahpa ã kunhõ nẽ kupĩ. Tã nhũm Tĩrtũmja àhpumunh tỳx o akupỹm ho htĩr nhũm akupỹm htĩr o htĩr nẽ Tĩrtũm nhỹ hã hihtỳx o hihtỳx ã amnhĩ to amnhĩrĩt. Ja pyrà nẽ wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêêta pyrà nẽ mẽ akõt ixpa. Tã kot paj ma akupỹm mẽ awỳr mō hãmri nẽ te Kris ra akupỹm htĩr nẽ hihtỳx o hihtỳxta pyrà nẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhỹ hã ijamaxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nà? Kot kaj mẽ apê hkwy hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêr ka mẽ ãm apê hkwy hã amnhĩ jarênh kaprỹ. ⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkõt pa ho pa jakamã ixpê hkwy na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỹ hkêr nẽ.

⁷ Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

—Pa Tîrtûm. Kwa tanhmã Korît nhõ xwỳnhjê hkrã hto kê mẽ tanhmã amnhĩ tomnuj to ho pa hkêtnê.

Anhỹr o mẽ ato kuwỳ. Mẽmo kaxyw na pa hte ã mẽ ato hwỳr anê? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mēhõ mẽ awỳr mōn pōj nê tanhmã mẽ amã mẽ ijarēnh to nê mẽ ijarēnh o:

—Kwa Pawre mẽ hkwyjaja na htem Tîrtûm kapêr kwỳm ri Korît nhõ xwỳnhjê jahkre ho pa.

Anhỹr tã pa amnhĩ tã mẽ kuma nê ãm mẽ kuma.
⁸ Na pa hte Tîrtûm kapêr kutã amnhĩ xunhwỳr kêtnê. Na pa hte ãm mẽ ate hkôt amnhĩ nhĩpêx o ri apa hã mẽ amã karõ kamã ixihyt̃x rãhã ho ri mẽ akôt ixpa. ⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nê ixkĩnh nê. Mẽ kot axpēn mã ixirerek ã ijarēnh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tîrtûm wỳr o ri ixpa nê kãm:

—Pa Tîrtûm. Kwa tanhmã Korît nhõ xwỳnhjê hkrã hto kê mẽ kot amnhĩ tomnuj kaga hpa nê hpãnhã akapêr kôt pix mã măn amnhĩ nhĩpêx rãhã nê. Anê.

¹⁰ Tã pa kormã mẽ awỳr inhmōr xwỳj ri ã amnhĩ kukamã kagã nhĩpêx nê mẽnh anê. Mẽ ate kamã harēnh nê mar nê tokyx akupỹm tãm amnhĩ nhĩpêx kaxyw. Kot pa mẽ awỳr mō nê Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỹr prãm kêt. ãm ã hã kapêr o mẽ ajahkre mex nhũm mẽ ate inhmar nê hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwỳjaja. ãm ja pix. Kwa kê ka mẽ ixkapêr mar tỳx nê hkôt amnhĩ nhĩpêx mex nê. Nê Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nê tãm ri amnhĩ nhĩpêx. Nê axpên kôt ajamakêtkati nê akĩnh nê axàmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nê mẽ pajamakêtkati jagjênh xwỳnh.

¹²⁻¹⁴ Nê ota jar Kris kôt mẽ pahkwỳjaja pa mẽ ixpimràatã mẽ awỳr ixpêr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpêr mẽ.

Nê kê Pahihti Jejus Kris mẽmoj to mẽ akutã nojarêr rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpên to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê Pawre na pa mẽ awỳr kagàja nhĩpêx nê ã mẽnh anê.

Tĩrtũm kapër ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f